

石函三種



昔人謂佳詩得江山之助余謂惟佳詩可以助江山往
見名勝所在必有題詠佳者什得一二類多流俗人疥
壁不可響邇雖江山不爲若輩辱而謂江山必能助佳
詩恐山水有靈寧孤立耳柳子厚曰蘭亭也不遭右軍
則清湍修竹蕪沒於空山矣信乎江山之不朽不在詩
在人也溧陽魏蒼石先生繇名進士官西掖與同官陸
義山曹實菴諸公以詩鳴旣出守吾杭杭故唐宋諸詩
人出守之地而西湖又詩境之最勝可助人者也顧杭
守之賢首稱李鄴侯白樂天蘇子瞻三公鄴侯開六井
建石函橋泄湖水民皆德之惜無詩故湖名不甚顯迨
樂天濬湖畱詩而湖乃生色及子瞻湖益廓詩益富至

方諸西子而他郡西湖皆欲附杭之湖爲口實佳詩之能助江山斷斷矣今先生官將及朞政清民和方欲大闢湖葑盡復其舊偶以他事註誤而罷人莫不爲杭民惜而余則先爲西湖惜惜盛事之不常而佳詩之少而寡助也乃先生畧不介意僦寓石函橋側室才容膝惟一僕自隨琴書而外蕭然無長物日取東坡守杭諸詩和之招余與許子莘埜相校讐時夏雨暴漲橋下閘水如江湖又如瀑布與先生哦詩聲相酬答先生詩日以壯而余輩酒興亦以豪間呼小舟吟嘯其中見者莫不詫爲仙吏而余輩亦儼然仙舟中人矣已又檢去杭後閩行日記及在閩所爲詩合輯之曰石函三種命余爲

序余閱毛西河先生詩話疑先生子瞻後身茲讀先生湖上詩直可補鄴侯所未逮而與樂天相後先誠有如西河先生所云其日記與閩中詩又有陸務觀之風特務觀日記無詩而先生兼有之總題石函者亦猶劔南集不必入蜀詩而皆可目以劔南是已抑余又有說先生往官長安詩名石屋西湖亦有石屋而先生之來應之今先生事旣白起用在旦晚間未必不再爲杭守如子瞻故事此則以石函名集信之也余湖上野人耳先生官時未嘗通謁近辱先生下交遂附識斯集以不朽行且家有其書士女比音而樂之煝煝然南北山有餘響而後知佳詩豈惟助江山實亦助人性情也夫

石言月
錢唐後學吳陳琰寶崖氏拜篋於桂蔭堂



西湖詩話

凡守杭者多稱西湖長西湖主人實則與西湖無與其長之主之者不過游讌時一祭酒耳惟東坡守杭則其前後政蹟別無可考只經理西湖一節絢爛史冊而杭民亦遂以此愛戴若父子魏使君蒼石守杭幾一載卽與鄉父老訪求西湖故址申請開復或笑其迂予曰魏公學問過人正在於此子不讀坡傳乎旣而公以他事去去而復來流連湖濱取東坡守杭時詩百餘首援筆和韻凡酒樓僧舍車箱舟版着處伸紙不數日而和已盡見者驚歎無不嘖嘖稱東坡後身及考公自識始知公真一坡也公論復湖在康

熙庚午而坡論湖狀適在元祐庚午此已奇矣至公以論湖前一年己巳三月補授七月到任坡亦前一年己巳三月除授七月到任公初受括蒼守劉在園代及去而仍以在園代公考之坡之來杭代林子中及去杭而子中仍代坡故坡與子中啓有適相先後之語天下有脗合巧湊如是者謂非再來一坡不可也若坡以廿六中制科公亦以廿六中進士科此又在守杭之外者或謂其詩同否則吾雖不敢抑坡然欲以加公則不必矣公自去官後瀟澹簡脫去來若落葉絕無有粘結在胸次者此正似坡處然則詩又其餘耳

右蕭山毛奇齡初晴詩話一則

西湖和蘇詩

溧陽 魏 麟徵 蒼石

和初到杭州寄子由韻 庚午

髣髴香山詎敢任寡求安分我還能僦居湖上輞川似
潑墨笑看王右丞

又

豈必髯公是後身我來天放作閒人烟波儘可浮家住
風月無須買作鄰

和夜泛西湖自題西湖載月圖

烏鵲一枝猶未安水雲千頃恣磐桓扁舟便逐秋風去
誰把寒江獨釣看

二
長堤如帶碧虹垂暮景空濛
通雨奇鶴放孤山歸未黑
湧金門外月來時

三
一水沉沉露氣橫漸高孤月
隱長庚六橋是處看如畫
欸乃遙傳空際聲

四
浩歌烟水寫茫茫鷺嶺飄來
桂子香欲到西泠橋下泊
五更初日透霞光

五
水仙宮裏訪詩仙散作東坡
月滿川敢擬鬱林歸載石

山陰乘夜興翩然

和天目山俯視雷雨

直上高峰置此身那知震電
歛威神乘雲乍似嬰兒語
不駭觀空物外人

和三月六日別南北山諸道人

木葉微波露更清重來何以
答離情漁山樵水慚吾拙
談易還將笑老生

二

坡老平生似樂天風流文采
並名賢石函水落葑田滿
慚負西湖異昔年

三

在郡一年虧十日登山兩屐去頻來湖邊魚鳥渾如昨
桃柳春風取次栽

和望海樓

八月銀濤萬頃來冰崖雪屋賦成堆弄潮最是好身手
跳入蛟宮舞坐回

二

蘇堤如繪曉烟斜錦帶橋頭十景誇疥壁舊題難細讀
剩看春蚓與秋蛇

三

天竺山居最上層空林一磬鳥巢膺法雲徧繞峰南北
靈鷲飛來象教興

四

家家晨起事焚香百尺燃燈照晚涼最好清秋三五夜
卷簾對月出新粧

五

西湖樓閣跨堤紅畫舫如烟柳浪中歌管酒闌人欲散
恰當夕照起推蓬

和靈隱前一首

生天前作佛後此意云何問靈鷲兩峰南北雲紛來合
澗之水喧如雷中有冷泉獨清沁洗盡塵土腸千迴我
守錢塘三百日偶入維摩講經席雨花散滿雲林居留
客香飯春新蔬拂衣我亦自此往何年相寄空中書

和雨中遊天竺靈感觀音院

蓮花青楊枝黃慈雲灑雨飛淋浪烟鬟霧鬢手提筐乘
風縹緲來虛堂

和臘日遊孤山訪二僧

雲在山水在湖琴聰蜜殊今有無歐公之徒蘇公至六
一泉畔心相呼家家臘日團妻孥斗酒自勞成懽娛醉
或鼓缶聲烏烏先生只愛林泉紆蕭然野興尋僧廬一
鶴雅與山同孤湖平如鏡淨不滓水底照見青青蒲靈
旗歛來伍大夫礮車雲起潮初晡古梅亭虛月欲上碧
海挂出風林圖得意自在琴言餘寥廓千載追羲遽探
奇我亦歸而逋雪泥鴻爪空中摹

和復用元韻

有此山有此湖登臨之樂兼得無臥遊欲令衆山響撫
琴隱隱爲之呼罷郡計已辭歸孥澄觀物表窮清娛造
物所闢本靈曠那復四望徒煩紆便入佳境如吾廬兩
峰未壓孤山孤鶴飛不來胡爲乎若有人兮依菰蒲枕
中秘論懷潛夫湖心浴日俄西晡柏堂竹閣化滄漭似
對積雨空林圖詩句爛發天真餘遙吟逸興忘遽遽梅
花何幸題林逋暗香疎影人爭摹

再和

月滿山風滿湖天心水面此境無鳧鷖鷗鷺眠正穩渚
雁不作砮砮呼方今 賜復除收孥賦詩飲酒聊自娛

西洲詩
嶢巖秀絕總登眺此身已謝浮名紆亭亭特立山中廬
大孤小孤未是孤俯掇芳鮮餐水腴蓮芡菱蓴苻蒲
草堂自謂真狂夫每出攬勝晨及晡南峰北峰拱相向
老鶴獨舉翔浮圖茲行畫足蛇之餘誰其主者顏與蘧
似爲山靈償詩逋歸來烟景憑虛摹

錢塘行和遊靈隱寺復用前韻

左江海右山湖錢塘壯麗天下無自昔三千射潮弩驚
走海若齊歡呼恬熙萬家耕織拏歲時伏臘相爲娛華
堂宴開腰鼓鬧况有絲竹音清紆魚鱗碧瓦城中廬珠
貝綺錯來鬱孤越羅蜀錦連檣俱光怪水陸陳伊蒲擔
負雜物奔千夫人影層縈迷昕晡市聲浩浩穿長衢水

嬉張作觀潮圖白公蘇公臥治餘知非我將年如遽高
峰爲謝鍾山逋勛業誰待丹青摹

和寒食未明至湖上

晨鐘初報動林鳥幾點疎星影半湖獨立昂昂沙際鶴
相看泛泛水中鳧芒鞋欲引花溪釣茗椀仍携竹火爐
最是浮雲飄幻甚白衣蒼狗變須臾

和虎跑泉

一泓湧出孤雲上澄碧影涵山俯仰鑿骨已澈玉爲神
掬手更凝珠在掌山泉清淨有本根環玦時聞靜中響
虎去泉移僧不知濯來自遠塵纓想

和復登望海樓

俗傳泥馬涉江來駐蹕臨安錦翠堆可惜岳軍堅勝鐵
金牌急遣一時回

二

岌嶷宮闕鳳山斜誰把中原形勝誇立馬吳峰纔見畫
南軍不敢鬪龍蛇

三

樹老冬青結子層諸陵問處已無膺錢塘百萬終航海
南渡如何紀中興

四

別殿頽基野菜香遊人指點話蒼涼權奸炙手俱亡國
錯怨西湖似冶粧

五

北來烽火徹江紅犀甲三千島霧中九死僅存文信國
夜深懷劔走沙蓬

和湖上夜歸

入林恐不深秉燭苦夜長况是山水勝兼之秋月涼孤
霞澹將盡樹靄浮蒼蒼若爲汗漫遊懷古情難忘遭時
各奮身青簡流餘香前者兩鴟夷吳越爭興亾成敗皆
英雄嘆息傳錢塘後來兩少保全生遜麋麀金石秉至
性百挫氣愈彊所以遺直士感激陳忠良

和紫薇花二首

絲綸閣下紫薇花分得爐烟裊裊斜一自香山移植後

西泠詩
絲雲常駐水西涯

又

虛白堂前老樹花紫絲晴護碧山斜開時已是千年種
爛醉俱忘在海涯

雲居絕頂小飛來峰望南北二峰環列左右儼
然一中峰也作中峰讀易圖和去杭五年寄
本長老韻

眺盡湖山在此間振衣塵外更超然香林徧是談經處
卜筮方逢學易年道德五千人度谷琴書六一客名泉
登臨便覺浮雲小漫擬高峰不語禪

和汎湖遊北山

空林鬱深翠愛此風露添好鳥下西澗墜葉鳴南檐古
來高曠士吏隱誰能兼塵世半鹵莽過眼爭穠纖山水
清且佳對景時開簾千載友元亮和之一子瞻詩人例
雖窮達者寧爲廉燦燦東籬花不受霜威殲

和會客有美堂

鏡中山色畫中雲不羨湘江水作裙桃影欲翻紅雨隊
柳絲初染碧波紋巢居鶴去追和靖觴咏人來憶右軍
恰愛湖心最清淺坐看烟月已平分

和飲湖上

百和花香風宛轉千章樹影月離奇一年總住西湖好
畫舫輕舠處處宜

又

風度鈴音替戾岡放懷合在水雲鄉湖邊三百六十寺
蓮葉空中禮法王

和天竺觀激水

水轉入山青飛流瀉瀉鳴天風來木葉併作海濤聲

和天竺山送桂花

妙理花香想竺乾結根况是蕊珠仙移來虛影寒蟾窟
開向秋風古鷺年澗曲叢生雲葉老山空子落露華妍
一枝爭似秬林賞聞得清芬滿院邊

和寒食同遊西湖韻

夢裏曾遊記昔年投閒更上泛湖船疎林紅葉清霜後

古寺黃花落照前酒戶已憑欺淺懦詩城未敢鬪清妍
舊來問字人如許百尺樓頭只自眠

和真覺院賞枇杷韻

去矣秋風裏重來近小春我懷高士駕誰念去官人盧
橘他時美黃花此徑新西湖烟水淨空影颺游鱗

和同遊西湖

波紋叠似蕉初展天半飛霞紅欲滿湖心日射光鱗鱗
碧水浮空空際遠一別蓬萊水清淺百頃瑠璃驚照眼
我欲乘槎窮斗牛且從宛委探金簡

和遊西湖

夜愛湖上月虛坐無塵聲衝烟蕩小艇已入空濛行老

西湖詩
鶴比人長獨舞時崢嶸水靜星可掬露冷如織雲戀此
泉石佳未爲魚鳥輕昔賢一窮達身退道自亨遠視水
光外海嶼丹霞生造物亦何有曠然同混成

又

清波一曲湧金門湖上亭空遠市喧乍有好風輕送槩
忽來華月滿當軒水雲半挾城頭起塵霧兼銷海氣昏
瀟灑柴桑吟可老見山真意已忘言

和望湖樓醉書

客來湖上尋詩料僧去山中趁釣船濃淡雨晴皆是畫
高峰插水水粘天

二

時挑野筍斲雲來小摘園花綴露開樓閣自連山窈窕
笙歌長繞水裴徊

三

櫻筍厨中不計錢楊梅如火壓金盤擷將蓴菜登匙滑
曬取黃花作茗餐

四

雜花成霧隱鳴橈臥柳和烟拂舞翹雨蓋擎來衫未濕
泥香屐齒更相招

五

留船多在寺門還踏徧芳隄那得閒風月滿樓看不厭
夜當湖水曉當山

和連日遊西湖

西湖天下奇曠若清意足隨步能移形秀異表矚目四
望山樓通輝媚滿川谷連隄墨雲起飛雨灑銀竹新晴
澹不波微颺漾淨淥俯見水底鱗藻影互穿逐泉深細
吐珠皎皎浮浴鵠我行自勾留歸裝未能促上有百尺
亭鶴侶人如玉憶昔蘇公來輒爲歐陽哭誰呼掘頭艇
沙際去獨速潮平銜遠烟月小挂疎木燈火映青熒書
聲出茅屋寄興且相羊得句時陸續偶携山水音快寫
爭刻燭便思御風行手注丹霞錄

和遊淨慈

城南鐘磬動湖山五百禪蹤一刹間露井泉香僧出汲

雷峰塔頂鳥爭攀千鈞鐵鑊何時供萬礎珠林盡日間
爲看金鰻池上影濕紅滿地踏雲還

和八月看潮

浪花纔湧雪千團捲地潮來赤日寒龕赭兩山浮似粟
淼茫銀海逼雲看

二

生長江干問阿儂乘潮遊戲慣兒童奔瀧駮霧連天上
擘岸轟雷出海中

三

潮信年年豈繆悠大潮生日指潮頭海門疋練飛千尺
直瀉天河作倒流

四

淚灑靈霄散紫淵怒潮此日聽猶憐跳珠碎繞六和塔
歎玉平分八卦田

五

潮回子夜唱天雞隱隱光收十丈霓欲向扶桑窮浩淼
日輪初上水雲低

寓雲居和雙竹房韻

似泛空虛不繫舟松風入坐影颼颼湖山盡是几前供
只有孤雲自去留

又

雲巢鐘鼓日鳴撞別自焚香對石缸默坐愛看無字易

朱研清露滴松窗

和寒食游南塔寺韻

爛熳寒花著意新盤陀石徑迴辭塵相招文酒多知己
未厭湖山舊主人趨走自憐三伏日遨頭却負一年春
縱然歸亦無家住好向清波問結鄰

和杭州遊山

山行宜秋深木葉蟲語答覓逕隨樵蹤林靄微見塔攀
蘿上岑椒手弄松際月空翠誰結廬軒開蔭雙樾到此
塵慮捐幽暢那可說凌虛或往還飛仙及劍俠峰從天
目來蜿蜒勢殊傑凝冰青晶熒疊石鐵巖嶭嶺斷排槎
牙岳轉簇鱗甲野果紅纍纍露綴枝半壓古碑臥蒼蘚

欲讀艱別挾嵐光烟霧鬢溪聲霹靂舌境恆旋已忘勝
遊惜匆猝俯瞰金牛湖浩蕩白鷗沒

和遊祖塔院韻

風送滿湖秋水香坐浮一葉高雲涼波澄翻作鴨頭綠
石瘦立如鶴脰長欲紉幽蘭心自潔未規筇竹品全方
烟簑雨笠往來慣買得鱸魚呼酒嘗

擬開湖和有美堂暴雨韻

萬人畚鍤動如雷葑草平沙次第開星斗光無塵隔斷
魚龍影與月浮來十分激灩波頭展千頃汪洋雨脚催
從此北函南窺滿蘇隄再頌事奇瑰

和梵天寺

長松半留雲梵放微出寺愛此空山空懸嵒躡飛屨月
來聞遠鐘散入海潮去

再擬開湖和視新河韻

君不見鐵幢浦上森如戟臨江强弩將潮射海塘捍得
鯨波平鳳舞城頭聳奇翼斜山學士香山儔重鑿西湖
浸空碧縱橫二十五萬丈南繞南屏北峰北兩湖春水
六橋烟長隄當中如一畫公去湖隄數百霜如公之才
那能得刺史風流仍姓蘇燃犀照見水底肋愛此湖開
澤萬家公餘小試登山屐指顧中流還舊觀葑田捲盡
寒雲色湖有巨魚長比人不困水淺鱗尾赤

又

古來問俗除所害陂池泉渠萬世賴西湖夾隄三百頃
亦似九區極兩戒湖水却比城中高城河旣開湖漸隘
坡公當日已上書長慮水慳六井壞况復葑積泥沙壅
變成桑田聽者駭漑種疏漕視此湖須以人工補大塊
畢引山泉潑潏通水族驚喜逞光怪南陽名杜水利修
棠陰載歌歌勿拜

湖樓和寶山晝睡韻

便將水石破微塵寫出西湖恐未真何似八牕俱洞闢
坐來恰見景中人

徐清獻公墓和哭歐陽公韻

墮淚何時斷天空淮海秋入山風露冷曳杖記從游

和宿望湖樓

初晴水無痕淡淡遠山色輕颺淨餘氛浸入長天碧幽
人峯頂來自曳穿雲屐登臨暮忘歸那畏秋氣慄晶宮
月吐珠散作縠紋赤宛然空中居烟雨渺泛宅書畫攜
米顛別墅擬摩詰森森玉繩低耿耿銀漢側皦皦孤鶴
聲飛去林影黑

和吉祥寺韻

荷衣蕙帶水雲裁攜得高峰積翠來境外林深人不到
鐘聲隱隱石幢開

和龍井泉

辯才棲此嶺雲巔一掬寒光獨沁然石竇當軒如灑雪

空林洗鉢可忘年烹來雨茗清殊俗聽入風篁逸欲仙
聞有老龍時睡熟珠從谷底映鳴泉

飲菊和垂雲新茶韻

楚澤餐騷客柴桑採去官落英霜比潔佳色露初團曬
向秋陽老烹從石井寒居然成茗飲香泛碧甌看

湖上和送仲元貺韻

秋水芙蓉如畫春風桃柳無言遠景孤霞淡映澄空一
鳥高鶩

二

提壺貰酒人去結袂看花客來兩兩漁舟對出翩翩鶴
馭飛回

三

乘虛似入雲行宴坐同遊月明一曲高山流水水仙飄
入琴聲

四

花塢竹坪遣日酒旗歌舫爲年白傅風流在否蘇公韻
事依然

五

瑪瑙經翻古寺繡香屐散遊人記取石泉槐火清明無
數尋春

和陌上花

杏花初開燕子飛紫陌舊是遊人非踏歌九仙山下去

緩緩歸聲人未歸

二

春晴陌上千花開
踏青人指香車來
石鏡山前錦衣樹
緩緩歸從芳逕廻

三

遙遙翠輦如飛霞
行時正開陌上花
爲報春風吹緩緩
年年好送如還家

和壽星院寒碧軒

隔水疎林綠半扉
森如寒玉映成圍
中虛犖犖有奇節
外直亭亭無垢衣
淨埽空庭延月到
橫敲石檻拂雲飛
此君居不令人俗
瘦影翻輕肉食肥

韜光菴和遊靈隱高峰塔韻

巢塲邈何所
理屐晨趣裝
願續白傅遊
蕭蕭天風涼
尋從靈隱扉
竹磳寒葩香
飄然陟層梯
似入無人鄉
遐覽盡奇曠
漸江如綫長
鳥託雲際窠
禪棲自常羊
幽奧列壑間
仙馭時廻翔
西湖湛一曲
海粟空微茫
引泉到山厨
煮石充齋糧
池中金蓮花
十丈垂丹牀
子結若淨餅
妙化思彷徨
老僧同吟癖
相對澄冰霜

和書林逋詩後

先生昔隱孤山
幽靜對一湖烟
水綠獨架危巢
老樹顛棲心空
谷人如玉愛古
圖畫多樵漁此
意條然遠時俗
豈肯著成封禪
臺太虛爲鏡神
爲燭當年風俗
因之淳

不露文章道已足况復詩格凝清嚴亦同下筆骨勝肉
我今不及見手書想象墨香金石錄玉簪端硯俱茫然
鶴飛亭高歌一曲俎豆並列三賢堂照耀風流寫絲竹
公去長留嶺畔梅後來更薦谿邊菊

和憶中和堂韻

城隅梵刹半離宮古木蕭蕭烟靄中地盡東南浮一水
天高西北峭多風

和宿靈隱寺韻

秋尋得趣此身閒行倦空林倚石眠嶺際斷雲垂是路
壁間飛雨瀉來泉清吟不厭成孤癖遠俗真宜與懶便
况有湖山容放漫扁舟草履倍悠然

和登介亭韻

城中一夜雨驅盡塵土溽西湖物態新千變觀未足仰
視浮蔚藍斷虹垂紫綠俯可數纖鱗漾藻入水腹近者
精廬烟鯨鐘出山麓遠從空翠來飛鳶起更伏橫看百
重嶺渴驥莽奔逐直立兩高峰獅蹲虎張目倒映波底
雲虬柯抱華屋側見石徑微盤旋歸鳥速駘蕩春光深
蠶螿聚遊躅客醉揮魏毫清歌翻屬玉書憑尺鯉寄字
滿鮫綃幅昨如鴻爪泥蠹簡那暇讀渚淺幾鷗閒林深
一場哭蠟屐穿芳堤詩成蚓語續自分木雁間尚比藩
羝觸矯矯猶龍子騎牛向函谷長與麋鹿群馳驚非所
欲聊爲放鶴吟翛然具野服

復和

江海首名都地性苦鹹溽如人善葆身須引元氣足湖
水開明眸淵秀逼肴綠寶石飾山髻空洞萬頃腹石函
扼咽喉霞頰映丹麓吐納日月精毫髮鑒潛伏四顧湖
心曠聲色紛微逐繞谿雙乳長尋脈發天目兩峰聳並
肩巨靈擘飛屋縹緲最上頭行脚去偏速芙蓉鏡中面
雲想留仙躅體若乘輕風噴沫灑珠玉美哉比西子裙
腰剪湘幅粧成濃澹宜笑口百迴讀此景誰效顰遠音
雜歌哭皓魄寫秋容微步凌波續沙清石齒齒已淨塵
影觸入抱冰雪融虛受形若谷五嶽方寸平胸次澹無
欲蓄眼看湖光快意成春服

寶石山和寶雲寺韻

樹老雲根石攫空霞天如醉綴飛鴻白光湧出千尋塔
獅子岳掀碧落風

看菊和垂雲花開韻

花與人俱淡幽尋見晚妍一叢秋最老九日暗驚遷露
裛金英粲霜含紫蕊鮮蕭疎香到冷爛熳錦看薦自愛
歸來把難逢插滿顛相邀仍冒雨醉賞飲如仙

同飲
八人

又作和答劉景文次韻

桃李春爭艷寒花老圃妍揚芳如有待孤介許誰遷色
比黃裳正光添碧釀鮮高枝擎月滿厚葉鬪霜薦影作
潛蚪動香辭舞蜨顛便從甘谷隱飲水亦疑仙

和邀往城外尋春韻

布颿何日作歸人日傍西湖羨隱鱗
橘子宜霜香漸美
蘆花如雪影初新
閒翻玉局煎茶帖
醉做柴桑漉酒巾
更與兩公爭倡和
敢辜風物小陽春

和懷西湖寄晁美叔韻

辛未

天目蔚奇秀聖湖鍾名賢
古稱山水窟靈奧氣特全
我來偶托跡萬境悉已捐
去畱亦何定行止信乃天
罷官久未歸旅食俄經年
登臨攬衆妙意得非言傳
時時獨出遊水雲相澄鮮
孤磬林杪出佈散空中烟
魚鳥自知樂花柳爭新妍
閒與漁父語醉向高樓眠
胸本無一物那用煩憂煎
蕭然城市遠步履擇所便
夜坐月中涼

省撲緣笑問稽畱隱豈携買山錢

石函和風水洞二首韻

寸水漑千畝兩隄爭一門
偶來逢放溜直欲溯靈源
入耳響逾靜照心清不繁
琴彈初月上如坐輞川園

又

一水盈盈自隔凡浮來雲氣老松杉
石鱗乍減波爭岸

塔影孤蹲徑轉巖爽挹美人新月上

公詩新月如佳人風傳仙

吏舊冰銜

謂白香山

我今卽次湖樓上貪看清光那得讒

和蔡準邀遊西湖韻

西湖之水清且幽九夏風生如素秋
柳枝垂天碧雲塢
菡萏擁日丹霞洲
引入城中斥鹵變小艇
一葉衝烟浮

古來遊宦那能數神仙作吏名長畱君不見唐時李鄴
侯鑿六井開金牛至今俎豆傳遺休

又

桂樹叢生兩山幽金風吹送江天秋月中子落靈鷲寺
雲外香飄芳杜洲湖可漑田獲千頃尺寸蓄洩烟痕浮
在郡無過六百日此湖千載稱勾畱君不見香山白太
傅沙隄尾石岸頭水聲洋洋歌未休

又

山水勝絕幽人幽西湖好景無春秋羅綺當風桃柳岸
笙歌醉月芙蓉洲沙清葑捲鏡面濶新隄十里如雲浮
便來湖上了公事高懷每向琴樽畱君不見宋時蘇長

公尋山寺登湖樓年年吟眺何時休

和宿水陸寺韻

湖邊柳影自成村流水桃花直到門自有杜陵吟遣興
非從屈子賦招魂雲開碧落虹初霽月上澄波露未昏
折脚鐺中茶欲熟鬢絲禪榻好俱論

又

坐見南山與北山孤雲來去亦悠然漫遊此日仍懷古
好飲何心更學禪拚棄簪纓辭俗累倦拋書卷作高眠
潺潺夜聽西湖水助我清吟獨竦肩

六月廿四日看荷花和得雙蓮於北山下韻

湖上荷花到處栽香風吹過綠波來吳儂記是花生日

淨看亭亭曉露開

又

碧筒香裏擘霞牋一渚晴開萬朵蓮更向西湖西畔去
採歸人唱白隄前

誦蘇詩和監試呈諸試官韻

我本田野人謀耕歲取廩揭向金門遊迂介媿賤稟蒼
涼辭故園遂踰二十稔饑腸饜葵藿暍倦惟水飲有時
發微吟醉寫翻墨瀋愛誦東坡詩真至儼神品此心與
之俱夙抱無內在格律高超殊物理細已審公昔西湖
來才名驚藉甚寸璣襲良珍片羽奪奇錦流傳金石韻
膾口絕塵礮一一照縑素飛揚尤踔蹇頗如見先生清

澈鬚斜凜筆底走風烟魚龍潛作淪世人恣譏彈青黃
亂果樵公詩坐臥觀手摹畫衿袵曠致寧有涯妙思亦
何朕居杭積五年前後時可詵嬉笑并怒罵鯖味雜鼎
飪近或追韓杜遠當轍謝沈我爲和詩畱半載忘食寢
恍然几杖從夢語示銘鏗絢爛天織成平澹衆喧噤更
欲問先生荒雞醒孤枕

汲湖心泉品陽羨茶和試院煎茶韻

陽羨貢茗驚雷生報春小鳥枝間鳴山客携來餉我飲
西湖坐拂荷風輕沸涌連珠茶候二竹爐髣髴高人意
驟聞松濤謾謾聲相煎素瓷乍點澄寒泉何似蒙山雲
頂採從蜀仙掌露凝碧於玉試啜一椀能忘饑雪香花

乳清雙睂茗與水性兩同潔中有恬淡真味隨吾廬頗
近荆南結幽夢起看孤山鶴去更避烹烟時

湖上對月和催試官考較作

我愛西湖中明月有長好忽從滄海湧水輪夜發清光
映瑤島竹枝嫋嫋影亦佳荷葉田田香未老欲登飛梯
尋蟾蜍合成七寶尤虛無何來八萬二千戶日與天工
充役夫山河大地鏡裏滿水底倒出金浮屠賞心樂事
誰能必此辰此景况難得千頃灩灩如列燭乘風又見
高飛鵠

和祥符寺觀燈

春風吹徧武林橋十里珠簾見月邀綠酒紅燈如白日

繁絲急管闌清宵蒲萄百尺金枝焰芍藥千叢錦色佳
門外森森多立竹晴隄正好雪初銷

和遊諸佛舍一日飲醞茶七盞韻

五山十刹標名勝纔到精廬便似家不解參禪聆說法
獨尋泉眼試新茶

南屏和送謙師韻

慧日峰高日欲浮聳立石作捧天手湖光淡淡如寫真
山色沉沉若中酒風靜鐘來出白雲森茫烟水空何有
家人誰勒卦爻文長與此山存不朽

和又贈老謙韻

公在西湖看盡山畱詩石上蘚痕斑我來更覓公游處

未是神仙興亦頑

和贈劉景文韻

楊梅色比桃花嫩味敵閩南鮮荔枝入口全消冰雪乳
杭州楊梅第一白質微紅者尤佳比之荔枝如檀梨橘柚各有其美

雲棲和寄呂穆仲韻

竹林深引寺前門矮屋橫斜古塹痕野饌山蔬風最樸
匡牀木几跡猶存雲分石徑來天竺路入谿田見梵村
各地此地栖禪無俗韻嬾殘煨芋可同論

湖上和錢四寄弟韻

碧草如烟擁畫輪好風吹作十分春便携釣具花溪外
我亦江湖一散人

和有美堂醉歸答鮮于子駿

市聲同一擾奇語發空悄寧聞秋蛩吟苦厭鴉鵲鬧風
來水泠泠月出雲皎皎五更睡初足起無塵事繞良友
所寄詩感懷本忠孝安得百子駿迄今猶憑弔逸思時
與答不眠幽興飽少陵夢謫仙大意見已稍情當醒後
真詎嘆關河渺清淺一水間默望疎星曉

和刁景純席上

濁酒中流載一壺野人禮法自全疎詩腸惟有五千卷
賦筆那能三兩都是處仙舟誇李郭偶來飛蓋重嚴徐
湖山烟月誰知已笑我清狂七尺軀

又

西海詩
海天東向接蓬壺欲往尋仙計已疎野徧八蠶成沃土
城高百雉屹雄都春秋吳越傳聞慣南北江山入望徐
剩有梅花香繞屋醉吟差可寄閒軀

和與景純倡酬韻

無數青山浸水光樓頭獨坐已生涼半簾雲湧簪裾麗
一曲風飄笑語香丹藥他年畱我老紫薇昔日看人忙
更思箕踞林中客九里松陰覆石岡

再和

牕開揖入遠山光三伏城中無此涼紫芋苗齊雲葉嫩
茨菰花發雨絲香鷗盟欲挾幽人往馬足長辭計吏忙
獨據高齋枯百尺起瞻威鳳自鳴岡

三和

斷橋烟柳曳波光行到湖亭面面涼荇葉微寒衣上翠
菱花淨拭鏡中香却看畫景無心學翻晒塵容底事忙
醉眼放開天水濶白雲縹緲萬重岡

同和張子野見寄三絕

過舊遊

聞說東南第一州昨歸已似夢中遊誰知柳綠桃紅岸
隔歲仍從此地畱

見題壁

紀勝時時續舊題墨痕素壁幾行齊那堪紅袖紗籠惜
半惹春風燕子泥

西湖詩二十三
竹閣見憶

孤山閣下水流雲
脩竹娟娟最可人
古閣廢來惟有竹
梅花還憶舊時真

和次錢越州見寄韻

空外遙看鶴出羣
石隄新漲護柴門
雨行響雜耳邊屐
雲臥飛高指上幡
吟詠游閒長慶後
風流映發大蘇存
越州亦自多巖壑
官舍蘧廬那足言

和又次錢越州韻

閒來鷗鳥亦同羣
釣艇漁竿近對門
吳客莫尋豪士賦
越人徒說使君幡
清吟癖自烟霞習
偶飲慚如壑谷存
可是韋編三絕始
從來善易不煩言

和答劉景文左藏韻

樓外輕烟蕩酒旗
養花天氣乍晴時
僧供香飯抄雲子
客有新歌付雪兒
纖柳作腰金
嬾娜芳蘭竟體玉
華滋
山光併入湖心媚
春事闌珊鳥語知

和答林子中

同心蘭發韻依然
前後相尋古道堅
代去餘波留此地
重來大澤喜旋天
鳥迎陌上新移樹
魚聽湖中舊譜絃
自有兩公千載合
風流長映錦堂川

和送張職方赴閩漕六和寺中作

昨過樟亭挂一帆
七閩漫漫從此去
荔支丹房火灼林
榕葉碧圍烟罩路
山頭寺接空江天
池有金鯽清碧環

忽聞潮來澎湃幾千里下視城郭人家如井底

和贈別

黃鳥交交不肯飛雙鳩喚雨樹間啼送君今夜西湖月
明日春江西復西

西溪和壽星院同餞魯少卿韻

牽舟岸曲亦為家何處香生油壁車入徑露垂青竹筍
繞檐風綻白蘋花林間避暑尋水壑天際瞻雲想翠華
最幸宸遊曾此過蠲逋清問野人誇

和送劉寺丞赴餘姚韻

長竿獨把珊瑚樹湖際連陰一尺雨曉起月額破廉纖
墨濤散盡雲千縷投魚深淵放鳥飛晝坐披襟作快語

漁翁拍手向我笑知我年來性無怒問字時時朋好過

勝氣籠霄談卷霧疎嬾真同七不堪受劾况有二宜去

忽思齋東篠間飲乞米還依謝仁祖時海寧太史陳先生送米青舫

吟從舊鄂君白紵歌成此溪女鳳山之阿懷鳳遊梧桐

實綴葉如乳便乘清風凌高岡江海浩漫指東注

和送子由出使韻

寵辱俱忘物外身西疇久擬試車巾曾無彩筆誇丹鳳
已負分符綰玉麟閩海夢回千嶂曉武林踏破六橋春
聖恩早許容歸里瀟酒籬邊一酒人

和送張山人歸彭城韻

江上危檣萬斛舟何如一葉此中遊風燈水枕聊乘興

西湖詩
酒榼詩瓢不繫愁敢謂著書身未老蚤知齊物志宜休
飄然泛入空濛去好採芙蓉到岸頭

和送錢蒙仲韻

神魚戲出浮水珍鳥鳴來報途一自比將西子爭誇幾
處西湖

二

蘭亭記自逸少梓澤名傳季倫奇勝那能至此湖山代
有高人

三

羅綺風香夾路玻璃月影侵門記向水西雲北還尋鶴
子梅孫

武林歌和介亭餞楊傑韻

武林西望錢唐門馬塍羊角堤綠邨相傳九十九眼井
委巷泥溷忘其源白蕩烟深暗古渡半道春紅花照盆
江漲人喧賣魚市湖墅一灣枯樹根錢王捍潮息大患
千載餘澤垂後昆碑版照耀此石鏡江流遠引西南坤
林泉佳勝俗囂侈化爭示儉來天言願共此邦樂無
事載歌清靜聞轡軒

和有美堂乘月夜歸

月光浮水水平軒暮靄纔銷山外山一幅生綃如畫裏
數行樺燭出林間波心露濯冰壺魄石髮烟梳玉鏡鬟
何似謫仙江上舫錦袍入夜醉歌還

過半山飲安平泉望石鼓湖和雪後至臨平韻
東行已無山半山橫連丘鐘聲挂遠樹谷靜風颼颼碧
幢寺門引古甃泉甘柔坐浣客塵淨飲之滌煩憂澄凝
水玉光萬化觀浮漚已近臨平湖烟景堪遲留石鼓不
復鳴石魚時出游

七夕和飲介亭韻

梧桐初帶綺雲涼瓜果中庭浥露香飛鵲填來河滅影
牽牛渡去月留光人傳乞巧穿針會客問支機織錦傍
今夕相看何夕也願添海滴漏聲長

和過周長官夜飲韻

卜居且與西湖鄰釀覓百花瑞露珍

杭州酒名花露

山水有靈

借韻士漁樵容我成閒人袖歸片石雲根冷醉踏芳波
月色春差喜病中無一事倦來午睡憑藤輪

客問余方外友口吟答之用雨中飲湖上韻

白蘇俱愛空門友我遜昌黎識大顛獨有牀頭易一卷
時時坐對可忘年

和小飲巽亭韻

何似西湖好環隄水竹園露梢森玉版月影凸金樽墨
灑千峰潤燈懸萬井昏我來尋一鶴霞舉更軒軒

雨舫和西湖席上

烟隄隱隱辨高峰放棹微聞遠寺鐘乍起颼風驅白鳥
旋飛霹靂過蒼龍片雲自爲催詩到今雨人來載酒從

莫比含顰斜黛感却看膏沐醉時容

和冬至獨遊吉祥寺韻

惆悵春回客未回梅仍作萼柳仍夢去年花發西湖曲
獨喜尋芳雪後來

和後十餘日復至

古寺寒香幾樹梅洛陽春色一叢栽只今草榻空林路
猶想花期次第開

和述古坐上同賦

名花富貴出天裁忻賞吟成二妙來此種自應歸閬苑
春風惟見野桃開

題牡丹和惜花韻

映空艷艷濃霞堆天工錦綉真奇哉結根紫府丹樓來
分出絳霄春方雷含芽直向深春開一時狼藉千花回
凡姿却恐花神哈風雨不敢輕相摧彤雲片片連蓬萊
繡幙高護晴烟栽仙衣拂日誰能裁雪膚未受紅粉污
午景灼爍浮金杯火齊木難光滿齋色香莫等塵中猜
幾番花信從吹梅豈待羯鼓謹聲哀

發家信用吉祥寺賞花韻

囊空不爲一錢羞欲寄音書向石頭若問西湖舊漁長
釣絲無餌亦無鈎

和湖上尋周李二君韻

湖底蘊百泉鑿引循地脈高城倚爲池餘波及阡陌郡

西海詩
人德此湖非止魚鳥宅山停水更聚奇秀迴莫測湖濱
久霖淖相過紛蓋屐晴見青芙蓉采采芳可摘汲泉插
膽餅對之若淨客緬彼六一泉猶懷君子澤古來曠士
胸豈因時地隔我欲從公游入懷月初魄

和去杭十五年復游西湖

湖上時傳雙鯉魚夢中已是十年餘笙歌幾換新遊舫
燈火誰成舊著書隔水平蕪添綠淨繞隄垂柳尚清疎
重來花鳥春風裏古壁題詩剩有諸

和法喜寺韻

步步塵烟外村村花柳中吳趨連越絕水繞到山窮澤
國三江尾川涂四載功雲巢幽鶴鶴石篆古蛇蟲樹影

峰全碧蓮香渚半紅傾城觀士女踏浪駭兒童海去環
天近潮來與月通登臨殊未已呼酒問鄰翁

和上天竺韻

上山復下山逶迤三天竺巖壑巧相引低昂如立鵠白
塔浮蘿烟紅亭俯松谷誰來坐澄潭制此毒龍毒鳥食
集其掌蟻行避投足出覩飛來峰空洞鏤寒玉玲瓏穿
石根虛敞露山腹吾本澹蕩人性甘友麋鹿沙門雖俗
外反受彼教束漸喜近自然泉聲勝竹肉

和智果院得心字

傍湖多精舍踞盡高山岑俗情紛萬變閱世求無心我
獨游物外自愛烟巒深初不問禪理到來風滿林遠聽

西湖詩
流泉出琤淙餘古音庭空日將午鳥語如相尋展書淨
素几焚香散幽襟蕭然一室寬衆慮無復侵我已忘有
我而况古與今便畱此間住亦宜投吾簪

和泛小舟至勤師院韻

積水迎眸爽氣侵晝長小閣坐深深風搖瘦竹青千个
雨洗高梧碧十尋散入霞光鮮濯錦涵來星影碎浮金
懷公曠代湖山主文字端然重禁林

又

白波風卷雪千堆吹淨炎塵亦快哉返照城連飛閣湧
孤雲嶺斷過江來谷中時發笙竽響亭外天懸畫幃開
却恐秋期歸棹迫滿湖烟月夢頻廻

和海會寺清心堂

佛云說法本無法誰問安心更覓心閒來偶因林壑美
逸興更引江湖深石枕潮聲聽不盡竹扉雲氣行相侵
我今非去亦非住妙理恍兼山水吟

和風篁嶺過溪

鬱紆陟南巘磳硤穿層丘竹淨不知暑颯然涼如秋空
翠衣欲濕苔徑無塵留古井泉一泓其下爲龍湫雙亭
百折上片石孤峰頭森森青玉繞篠簜含烟浮水雲自
深靚風日兼清優溪九澗倍之地有九溪十八澗蒼茫爭奔流
微從林靄缺望入西湖遊地偏心益遠默坐蠲沉憂

和戲贈韻

沙河燈火照如春聞說東園錦樣新機杼千家勤夜作
織綃還似泣珠人

偶作和辯才歸天竺韻

酒樽覆餘瀝鑪香蕪微灰聽我歌慷慨斫地何須哀遙
遙天目奇飛舞層巒開浩浩錢塘濶浮空卷氛埃雲晴
富春樹潮暗嚴陵臺賞心得彥會談笑無譏詼古重文
字飲坐繞烟雲回江山旣全勝不醉胡爲哉况將捨此
去荒徑尋歸來豈止憶風味野筍山楊梅

和舟中望有美堂飲處

清歌幾曲醉紅紅迂濶人當笑此翁似打池邊閒野鴨
鴛鴦驚起翠濤中

又

柳絲千尺縮斜暉初澹橫烟鳥影微一道裙腰秋艸碧
採菱人似鏡中歸

用張子野買妾韻

狂夫老更爲詩狂未覺年來鬢漸蒼鶴韻携同娛野逸
蝶情夢破厭春忙莫誇楚客蘭爲佩須信吳兒木是腸
借得牙籤書萬卷篝燈夜永讀虛堂

用六和寺水軒韻題放生池

萍香藻影漾中流略約斜通沙上洲願得衆生如本性
不妨無放亦無留

和七寶寺題竹

露淨風鳴石雲開月滿林高枝青箇箇入臥早涼侵

和此君軒

脩篁映水碧鱗鱗屹立蒼然君子身若作洞簫能引鳳
柯亭試問賞音人

和題春蘭

蘭生有同心衆草難並獻採之深林中香遠久益見紉
爲楚臣佩搯美魯聖傳豈如桃李花飄泥踏春燕

和題蕙

蕙與蘭一性花葉微不同愛此數寸根樹之百晦中光
風轉初綠含英吐晴空他時結成帶芳氣猶相通

和周邠寄雁蕩圖韻

採芝元是住山翁分得仙雲自絳宮聽入龍湫千嶂雨
吟成雁宕一谿風盤旋跡已超塵外浩渺懷能吸海東
滌筆天池寒湛露寫來未盡半胸中

又

雁蕩山有芙蓉峰下爲芙蓉驛

芙蓉別館此間同照耀光分日月籠筆力五丁開絕嶠
文瀾千尺瀉垂虹烟棲偶值山中侶天繪奇傳海外翁
擬食仙書如脈望猶將凡語託詩筒

山遊雜詠和佛日山方丈韻

好句多從佛舍成至今禪喜頌公名我來只有看山癖
懶與緇流話送迎

二

徑轉疎林護石欄蕭蕭水竹一池寒如萍老衲眠雲侶
不羨空中幻色看

城南普
度親菴

三

幾處談禪鬪齒牙自分門戶算恒沙法中龍象何從覓
神馬終須出渥洼

四

結廬曲曲愛山深那是祇園盡布金世外人偏工世法
如來教本說無心

五

空林夜誦一燈明曉起庭中虎跡橫解得本來真實義
高人不必以詩鳴

和六觀堂草書

篆籀既變字益滋隸文真楷隨時須草書善幻古法無
用筆天矯神形殊兔起鶻落頂已徂興酣忘物兼忘吾
墜石倒挂蒼藤枯雲海出沒龍蛇俱飛仙劍俠空中軀
化爲百鳥春風娛奇縱作態如狂奴淡非苦瘦濃非腴
筋藏骨立清肌膚顛張醉素休爭呼散花來繞千名姝

和雪齋韻

我聞昨冬雪飛數千里凍斷江湖冰徹底錢塘潮來不
得上苦寒人僵走如蟻爾時正憶孤山中踏雪何能遊
寓公前年花開早封印

唐林寬詩花
開封印早

匆匆尋過雙高峰

去年花時在閩越暗香夢嗅三更月今年臘到知何之

莫別梅花空見雪

和鑒空閣

萬象迹本虛吾心起真境空際無月輪大地作何影默
坐澄懷觀湛然澹瀾永八牕與俱闢朗玉映冰鏡曠蕩
千載遐胸期對耿耿障霧有時消纖翳還自屏如此鑒
亦空孤閣挹清冷飛螢暗相照獨鶴夜深警古銅尚含
靈自名敬元穎此心靜中涵月出在東嶺

和新作垂雲亭

江山須亭榭結構取清穩若非位置宜雜沓笑連蹇誰
爲垂雲亭坐對奇峰晚物態觀去來道心知益損岡蹲
一鳳高石起羣羊狼四望何翩翩飛霞浮疊巘青分湖

尾長白壓潮頭遠竹香新露流花暝孤烟返想公所題
詩得此足肥遯愛飲我學陶詠懷今遜阮便當棄殘書
皮閣束盈捆種秫二頃餘種菊三百本聞有雲下田沙
礫可自墾客來過我吟怡雲眠且飯

和書白雲堂壁韻

水拍平隄晝掩扉綠槐隔岸晚涼歸乍看一縷雲如墨
化作長空雨色飛

和孤山二詠

柏堂

堂成古柏映堦前鐵幹凝霜獨凜然剩有靈根蟠百尺
還從神物護千年孤清骨瘦如人立不朽名高與世傳

欲問西來無盡意庭中樹子亦通禪

竹閣

傑閣崢嶸望杳然森森祇有竹當軒歲寒恰得梅為友
春煖還添筍作孫白傅詩懷宜水石蘇公墨派出江村
並留遺像空林裏徑踏蒼苔聽鳥言

和雨中同遊寶山韻

樹底明湖屋外山高吟境與此心閒北牕一枕悠然醒
別墅尋來水竹間

和寶山新開徑韻

到處青山如舊識况兼濟勝不須扶數峰便可窮三島
一水居然並五湖步引凌波霞擁佩光連泛海月浮壺

籬邊坐愛清談久任有鄰家夜醉呼

題硯詩和於龍井得歛硯

琢成方質砥如平灑起春雲墨一泓老我歸耕惟片石
筆端風雨出歌聲

立秋夕用吉祥寺僧求閣名韻

三更梧葉報涼風大火西流影半紅今歲秋遲因遇閏
何時伏盡暑雲空

七月十五夜觀湖燈用飲湖上韻

梵音繚繞夕烟中幾處笙歌似畫同一葉舟迴清露白
千花燈放綠波紅

和留別釋迦院牡丹

春光如酒釀花時幾回醉詠花間詩天教花能助奇賞
含情爛熳東風知公來惜花興未已曉露一叢花開矣
似添金谷繁華枝吹送西湖香十里

和孫莘老寄墨

輕烟燒老松墨譜誇精工擣之破千夜似煉丹爐翁丸
分螺子黛文映雕盤龍只疑得神珠探出元冥宮點漆
光若鏡香氣浮簾櫳忽灑陣雨黑滅没吞飛虹莫染畫
看管徒爲遠山容

二

勛名爛景鐘文字耀方版豈爭蠅頭書密似蠶絲縮夜
擘芙蓉牋燭花新照眼停筆時自研澆汁防汗簡搨本

傳金石鋒穎半已剗藉此欲摹古殊抱臨池赧

三

空齋舊藏編苦被蟲鼠齧願遂手寫經初種庭蕉葉誰
搗元霜杵製比明月玦滌硯起開函幽采映几篋試磨
一點烟散作鬢雲結妙手埽絹素或似濡髮帖

四

我亦知守黑蚤爲綺語戒時猶吮毫端山水負詩債橐
脫紙屢費題就壁添疥清芬雜葩流機警殊俗械龍賓
十二笏隱隱發光怪腕拙寧自藏把酒並持蟹

和錢安道寄建茶

我昨曾爲閩南遊閩友飲我武夷茗飲罷頗同味諫果

回甘最引人深省爲言摘自峰頂遙徑躡飛梯谷聳聽
此山奇奧海內無佳卉特全天子性烟霞日月滋芳根
儼如松柏獨也正建溪之泉清且醇沸點建瓷俱淡永
活火纔生魚眼微瑟瑟雨聲聆漸猛銅腥鐵澁未許煎
石銚仍須淨沙礦乳花籠霧紫雲凝清峭徹骨珊瑚冷
消去十旬塵土胃豈但入喉化強鯁年來真品更難得
徵取苦多倦登嶺先春蚤貢雨前芽壓盡龍團千萬餅
茶熟恰逢新月上甌香淺映星光炯乍分涼露滷金莖
似擘晴蓮開玉井草茶凡種浪得名慣潤肥腸一何倖
此中鬪茗如戰酣我欲作歌敲柳癭

和櫻筍韻

越江江頭吳江尾不弔子胥弔西子潮頭怒壓城頭高
捧心最艷湖心美我和公詩如公云四十九年窮不死
公和太白詩亦云年四十九感茲理

西湖絕句用梅花十首韻

風景依然似永和西湖觴詠坐來多高人更比梅花韻
每聽清吟喚奈何

林和靖逋

二

迢迢曾上嶽蓮臺筆底三峰烟霧開歸向錢塘新月晚

一庭花竹淨無苔

潘參軍閬

三

嘯傲湖山日往回清涼居士雅懷開頻年混跡漁樵裏

獨自騎驢得得來 韓蘄王世忠

四

晏居懷抱寄清樽
曉起看花直到昏
不是花開城不入
左司一笑寫花魂 張員外昱

五

花翁隱只種名花
門對西湖花港斜
與至喜吟長短句
彈琴偏近水仙家 孫花翁惟信

六

堂成玉照繞花開
四并宜將四序催
雪棹梅園香十里
畱芳更待賞春來 張約齋鎡

七

諛墓投還潤筆貲
石塘文重桂林枝
秘方自愛休糧好
士俗原來不可醫 胡汲仲長孺

八

嚴陵臺上雁南飛
灑淚敲殘如意枝
行傍西湖多古意
看他晞髮獨吟時 謝臯羽翹

九

蘭亭帖在此身輕
歌罷離騷月正明
書畫相携同海嶽
艤舟湖上最深情 趙子固孟堅

十

外史曾依句曲家
削成山志筆無邪
同遊翰墨王孫貴
徒歎春風三月花 張山人天雨

秋熱夜坐用鹽官部役韻

苦熱只思嚼寒冰墻腰斜挂月半稜攬衣起坐庭際露
非因夜永求夙興牀頭饑鼠踏瓦縫唧唧破我吟詩夢
空堂闕若無人聲誰家笛作涼州弄揮汗晝常對客勞
雪水煮茗啜肥羔臥月西湖天已遠東華敢憶香塵輓
又作用南漪堂杜鵑花韻
何處空庭夜月無坐來清冷浸攏榆更看竹柏交加影
那必烟波繪滿湖

和參寥惠楊梅

老屋因巖架幾椽白楊梅好不須錢荔支香艷名雖盛
清味須君品入禪

地有楊梅焉其
白者呼聖僧梅

湖上看花用冬日牡丹韻

花似人癯愛隱流人同花冶態堪羞霜根雪節垂垂老
錦艷香妝亦易休

二

縑絲聲發棟花風小熟櫻桃萬顆紅點綴田園多景好
稻垂麥仰盡天工

三

水仙花對玉堂仙何處南漪訪杜鵑最是梓花開若繡
誰能品出此花妍

高江村學士
近有梓花詩

四

簇新花朵護名園嗇雨慳風怕日暄獨領化工塵不染

竹牕清映古梅根

和有懷錢塘寄述古

花外丰姿柳外身西湖烟景最宜春一冬雪淨隄邊草
二月沙清水底芹時有戲魚來引婢豈徒飛鳥解依人
我行未爲娛遊覽却得狂歌作酒民

二

豐樂樓前興欲飛莫孤心賞與春違柳烟似織新鶯語
花雨初沾舊燕歸曲水流杯今日近映山畫閣舊時非
城隅腰鼓千聲出何處輕羅試舞衣

三

華堂客滿宴春風座上猶聞說孔融避俗襟期從此老

登高興會有羣公數行讀史宜浮白百首題詩讓比紅
山水有情憐別韻花香入指送歸鴻

四

幾度清樽酒半酣倦來小立傍風檐環隄水滿人稱白
釣瀨臺高客問嚴百頃稻花香罷亞千村筍甲味清甜
夕陽背入錢塘路踏破苔窠屐齒黏

五

百萬人烟 聖澤濡薪猶如桂米如珠湖分遠黛能深
淺山點空青半有無組練至今棲甲士車纒自昔聘名
儒還家夢遶蘇隄曲水墨圖開四望迂

天竺山後觀石和金星洞銘韻

靈鷲飛來拂其翅俯接雲根翥未起化爲巖石殊怪瑋
深洞曠虛却虎虺奮雷初出燒澗尾斧鑿剩墨壁如瘡
我觀天劃神鏤似嵌空玲瓏不足謂敢斲一峰與公比

和法會寺橫翠閣韻

湖日東西橫隄形南北縱晴雨含異態朝夕對改容閒
遊山水間寓物不畱物飛樓壓峰腰孤塔湧石額涼風
初到思歸期古來秋士懷多悲獨喜牀頭一斗酒坐臨
湖水時開看月光偏照離人好短衣射虎歸田老撫絃
莫作雍門哀酣吟更上初陽臺他年桃柳三月放野客
或從湖上來

蘇長公有和陶淵明詩百餘首寄潁濱云至其得意
自謂不甚媿淵明豈獨好其詩也哉如其爲人實有
感焉余去官畱杭州日坐湖上執蘇公詩一卷讀之
飄然如見其人慨然思從公遊而不可得竊倣公之
追和古人和其西湖詩若干首夫公詩似陶仍是公
我詩擬蘇故是我媿我詩不足存存之以志舊遊山
水之間將移我情質之前後遊西湖者麟徵自識
西湖和蘇詩一卷庚午九月杪至十月中成九十首
今年閩中回仍畱湖上又得一百二十四首蘇公詩
多矣其不係之西湖者不及和卽杭郡所屬諸邑中
名勝如徑山之類余足跡未到亦未能妄和有和題

卽和韻者題無韻字重在題也和韻不和題者題有韻字專取韻也又有借韻而與原題偶似借題而與原題之意不同者非敢一一強合以求附於古人也時寓瀕湖之石函橋爲石函三種之一云
康熙辛未秋七月旣望 石屋魏麟徵又識

仁和張 琨禮菴

受業臨安盛弘遂紫翰全較

錢塘許 田莘野

閩行日記

溧陽 魏 麟徵 蒼石

康熙庚午十一月十日丁酉從杭州西湖至湧金門登岸出鳳山門細雨如霰彳亍泥中行二十里抵浙江驛一舟如斗大是夕泊錢塘江干作詩代家信

久爲錢塘遊復與錢塘別閩南二千里望望遠山碧冒雨沾邨醪聊自壯行色冬寒襆被輕獨往天際客

戊戌江行六十里富陽縣界六十里富陽城負山面江有春江第一樓晚宿其下成一絕句

晴江似釀蒲萄綠霜徑仍畱楓葉丹曾識富春圖畫裏披裘人坐釣魚竿

己亥四十里黃山頭十五里桐廬縣界道中書所見
江清石見底染作柳汁綠魚起跳晴波中流沉巨木畝
棲餘稻梁鴉啄牛背肉林端畫眉語群雀巧喧逐水淺
漾煙深似泛西湖曲爬沙拾黃蛤盈筐易斗粟山徑叢
野梅花發照寒玉我歸及早春乘流芬可掬

十里柴步二十里桐廬江山最勝念烏木棲羽如葉
獸草遊毛如卉魚水居鱗如波造物者何心耶因物
賦物物與无妄也人象天地而可自褻耶咏以作箴
萬物任氣化雜然各殊形人生天地間實惟萬物靈覆
載中本虛人卽天地心忠孝性自秉大節卓古今天經
義在人惇彝倫頂圓趾象方何敢藐此身前古後

萬年爲善無近名至理若粟帛所貴常存誠

過桐廬有灘西爲桐江驛

小邑無城郭人烟逼水涯青谿剛半里白屋可千家塔
影孤懸樹灘聲穩帶沙江峰環似簇漠漠鳥飛斜

三十里瀧口上爲七里瀧

庚子五里過嚴先生釣臺臺臨大江地稱錦峰繡嶺

磻溪一叟占非熊桐溪一叟稱冥鴻釣臺斗出江烟中
下顧無地垂虛空沙清水碧涵玲瓏先生千古留高風
客星耿耿如長虹莫矜諸將雲臺功一絲九鼎光無窮

又

臺高釣瀨與雲鄰曠代風餘古逸民澹月一鉤星作餌

橫空百尺水如緡朝浮嵐氣迷青鳥夕捲潮聲變素鱗
未覺故交天子貴羊裘獨自老江濱

二十里望夫塔

夫行遠未歸望久化石質爲語天涯人如何忘琴瑟

二十里建德縣界烏石灘茅屋十數家積薪水次鷓
鷓捕魚灘流湍急滾滾出亂石中篙工力與灘爭乃
得上三里風門灘二里篠里灘又里許曰小灘悉如
之南北岸兩峰對峙頂有白塔亦稱南北高峰是爲
嚴州府治建德附瀧口至此七十里諺云有風七里
無風七十自錢塘來皆西行過此漸折而南矣

山城粉堞出梅花

郡城如梅花形

郭外川迴鵲尾斜

西流入新安

簾

捲數峰飛入座碧雲香裏放朝衙

十里桐溪步

曉從桐溪來夕向桐溪去一水遶千山斜暉起烟霧

十里石壁灘東岸橋山形如石房或如樓閣層疊結
構聳出雲際西岸石壁巉立如削亦一奇也

仙子好樓居乘雲來此山羅浮橋欲熟猿鳥驚難攀

十里過小洋灘大洋灘遙見燈火漸近聽犬吠聲有
烟村可泊遂繫舟焉

辛丑早行十里石塘洪有作

遠峰近峰同一烟上灘下灘爭一泉挂藤巖落石轉側
繞樹隄引沙迴旋嵐蒸欲作五里霧嶺斷忽開半壁天

凌風縹緲何所往茲行奇絕如求仙

五里三河灘五里將軍巖下臨深溪旁列嘉樹可坐
以避暑五里桐子山三里交步蘭谿縣界

自入蘭陰路風香引棹聲連山從此斷遠水有餘清霧
樹凌空亞霜花匝地明夢遊天姥近婺女一星橫

五里金梁有灘石淺水迅人急持篙始而立繼以偃
僕又繼以坐終乃仰臥篙爲之曲舟稍進又起如前
或以手推或以肘抵或以趾拒奮全軀之勞喘汗懾
息以渡若舟與舟相觸則寸不能上諸灘盡然五里
焦石灘石如烟色竹筏浮灘而下倏已遠颺湍逆流
遇石尤風殊爽然失也十里女步浙鹽行常山江山

者到步易竹篾以載

篾二十
二觔

十五里過水步至蘭谿

屬金華府城西爲澱水驛自此南行

澱溪灘瀾舞沙頭野渡橋成纜小舟映郭玲瓏山八面
金華碧蘚洞雲浮

又

萬家鱗次出城頭百賈翩聯銜尾舟天上一輪光欲滿
清吟人似鏡中浮

壬寅蚤發經磨船灘下橫山鷺鷥灘上橫山共十里
蚤從蓬背拭微霜十里溪行帶月光近郭市喧雞罷唱
橫峰岸轉鷺成行布帆暗染濃烟濕石鼎遲煎活水香
紅日出銷連海霧濯纓清興寄滄浪

二里皂莢洪三里水居灣

水姓所居

波粼粼石鑿鑿遠疑百尺懸飛瀑短篙無力人語澁曳
纜泥行如郭索五步競挽前十步俄退却岸濶舟膠沙
走水落移柁渾拖春雨犁芸芸千斤耕确碣礪中殷殷
纏雌雷噌吰鞞鞞石相搏到灣倏已洪流平回顧空令
意駭愕

二里伍家聚

子胥後

三里蘆葦灘七里裴堰有灘

細流亂石淙曲曲如蟠蛇數舟擁欲上搖曳成橫斜前
者樹杪落後者牽淺沙憶昔楚逋臣乞食曾無家吹簫
過凌水有女岸擊紗壺漿戒之掩沉淵去咨嗟投金報
故里深識非鉛華我本吳鄙人初耕瀨東涯烈烈伍相

國千載猶爭誇

五里帽頭潭龍游縣界十里童灘

上中下三十里七都灘

已過蘭谿水芳風飄自南行吟雖澤畔不比楚江潭

見水碓

水激作飛輪春聲高下喧偶來看米熟只尚欠篩存

觀捕魚

以漁名漁家樂以漁利漁人惡忘江湖縱大壑我非魚
知魚樂坐垂綸取不虐牽網罟施葦箔智既窮用鴉鵲
物命戕一何惡願謀生慎所託

聞雁

叫入遙天去嘹嘹雁幾群書空時作字布陣亦知軍曉

帶瀟湘月春迴衡嶽雲稻梁謀豈敢祗恐雪雰雰

又

獨聽天南雁一聲霜風如剪陣雲平家園有弟時相憶
目送歸飛悵遠行

五里鵞頭涇二里相公灘三里亭步驛

距龍游五里

歸鴉繞白塔飲犢踰碧流樟林不受霜葉密含烟秋落日大隄橫返照當山樓莽莽暮雲起月來湧行舟清光攬不竭拂拭新吳鉤

癸卯五里木灘五里陳灘作雁字詩二首

翩如百尺寫凌雲筆陣驚看玉是群月滿平沙裁別賦天高紫塞學銘勳題名已剩慈恩蹟問字頻翻碧落文

知爾匆匆無暇草家雞野鵞望中分

又

染就湘江幾幅雲誰將戲海比鵞羣風霜自挾飛鳴勢霄漢常依翰墨勳一畫縱橫如變體數行斷續做遺文書人例是春秋筆大羽徒傳擅八分

十里野狐墩五里羅漢松各有灘過桐廬至此始見紅樹數株出林莽間與藜碧相映掩靄朝曦景可留翫大約蘭谿諸灘視建德頗高難渡自此而上愈高愈難渡矣五里迎春潭西安縣界五里培風灘

上下二

十里黃溜五里安寧街

水清沙白草迷茫綠樹微紅半著霜姑蔑峯高連太末

溪流似束九迴腸

又詠鴈字

霜空幾點笑塗鴉字字橫飛影半斜題向天門思一語
年來蹤跡倦泥沙

獨樹歎

獨樹無枝葉結根託荒郊其下蔭瑤草其上珍鳥巢
聳若長虬影拂疑潛蛟愧非棟梁用不登廟堂高輪囷
有誰賞挺拔良自豪莫識榮枯理生材隨所遭龍門百
尺桐絕俗成孤標

五里箬帽灘五里楊村灣五里張港俱有灘

灘高十尺礧礧白石水不盈指我舟安適或推或挽衆

響齊力牽舟陸行如鮒過轍浩浩江河蒙衝利涉底莫
能窺渺此一葉心惟淵鑒深以蒞德

五里牌湖岐有灘淺如前五里樟樹潭

巨竹浮江筏穿烟記石痕遠乘谿作漲直到市當門鴈
度霜飛樹雞鳴月挂村民居山更樸風俗古猶存

甲辰五里雞鳴塢五里帝王灘灘三十里浮石潭二里翁

步三里蘇木灘次衢州府西安縣水亭門外自錢塘
至此計水行六百里前路水涸將棄舟登陸野望作

地控炎荒路天欹牛女星閩山千樹綠越水萬條青近
日災傷告多年戰伐經僊霞扼重險海外觀情形
乙巳曉起過衢州通廣門向光遠門外西南行

停颿野際月茫茫夜半雞聲徹曉霜百粵西連溪作帶
七閩南指海浮航渡江風物衣冠盛闕里雲仍俎豆香
何處可尋清獻跡翛然琴鶴想輕裝

又

半肩行李萬山橫乍過三衢一問程梵夾只携詩卷富
籃輿長挂酒瓢清村空古井尋雲汲野澗荒畬費火耕
洞口千年柯已爛誰傳不朽是虛名

城南有
爛柯山

五里打鐵街三十里北林橋上偶成

水印潭心月山簷樹頂雲平橋新漲綠魚戲落花紋
十五里江山縣界五里大溪渡五里平塘五里湖村
荻花如雪罩清泉渡入平塘石徑穿溪上青山千百疊

夕陽渺渺見村烟

十五里江山城北宿環縣高崖邃谷景特奇勝

此身丘壑宜盤桓何事更歌行路難去看江郎三片石
憶過嚴子七里灘學書僅取記名姓俳語漫勞雕腎肝
眺盡南來好山水海邊欲拂珊瑚竿

丙午入城出南門五里嶽廟寒甚輿人燎火久始行
霜鋪野草白於氈路入危峯峯際天幾處青蘿縈古壙
兩行碧樹瀉飛泉凌空有石如人立曲磴無塵只鳥旋
我獨南行尋勝槩閒看松老欲忘年

十里清湖過渡入閩至此溪流已斷皆作山行矣
臨谿石壁嵌空懸岸底玲瓏吐一川蘭若高樓孤樹杪

飛來磬響落朝烟

十里花園岡有寺寺內黃楊甚茂岡頭小樹半作紅葉亦山行所僅見也僧持武夷茶飲過客題一絕句黃楊全綴綠紅葉半留青去住因僧話塵中一旅亭

五里昭明橋

谿橋橫結屋題字曰昭明我欲携琴寫高山流水聲

五里石門鎮

地有石坊故名

亂峯環似槩空巷表當門客飯匆匆路人烟曖曖村谿凹穿石缺橋斷駭河奔霞舉聞仙足峻嶒古木尊

十五里江郎街過江郎山俗傳周霞隱名史卿修煉於此後仙去所至輒著靈異仙霞關因以得名山巔

三片石劍拔亭峙陡險莫陟其石隙呼爲一線天誰將巨手劈層嵐縹緲峯來望是三霞表晨飛金彩鯽雨工時蛹碧絲蠶鍊餘五色天留補壁立千尋霧半含我欲憑虛凌絕頂鯁封直指海東南

五里楓樹岡五里蘇嶺土石皆紫凡險峻處輒步過對此溪山與頻行履欲穿巖空危墜石澗小曲通泉側上千盤路回看一線天偶來餘逸興未敢託尋仙

五里峽口宿

暫借蘧廬榻悠然到夙興已無風入枕况有月爲燈夢覺濠梁叟餐眠雲水僧客行隨所住灑埽記吾曾丁未蚤大風五里鷺鷥亭

天風獵獵驅塵沙滿地無復堆霜花夜來布衾冷如鐵
隱如潑水穿牕紗人傳此風出此峽龍蟠洞底癡雲拏
有風占晴只五里起時吹送丹青霞三衢一自兵燹後
饑饉災異頻仍加前年梅雨水大漲漂蕩廬畝成溪窪
其魚可憐民命賤豈獨沉竈久產蛙今年二月大雨雹
驟同飛礮翻雲車魚鱗屋瓦擊盡碎麥隴摧折青青芽
牛羊奔竄半壓死老弱環泣棲無家嗟爾衛民困已甚
蠲租幸賴 皇仁賒入夏苦旱秋苦潦菽黍不實餘枯
叔山田磽确變榛莽那得衣食矜鮮華風乎風乎蚤須
息勿使寒餓貧人嗟

五里五雲亭一里三卿口文昌橋五里窯嶺脚五里

窯嶺頂有亭俗呼窯半天過嶺五里保安橋

亭亭飛翠如烟鬟窯嶺脚踏村溪灣嶺高直在半天上
一徑斗絕穿雲攀微風飄衣臨古岫下聽碧澗鳴潺潺
巖深艸枯樹半綠行躡亂石皆堅頑回視已遠天際路
只有紅日懸孱顏

五里僊霞嶺十里過嶺有關

晴空突兀梯青霞飛磴倒出松顛斜洞門水滴巖落乳
石矧度接丹源砂孤雲盡處天一角千峯萬峯排槎牙
遙瞻紺宇寄幽壑徑轉詰曲箐林遮憶昨曾爲用武地
首尾據勝猶長蛇蠶叢劍閣比守隘盤旋絕壁沿如蝸
海徼藩臣莽跋扈羽林絡繹聯江涯五丁更鑿千丈險

齊驅結駟駢鋒車 廟謨指顧下南服依然野景恬桑
麻臺灣置郡悉內附海外重譯來 天家人指昨年山
凹路積骸滿谷餐饑鴉古來關塞盡若此時平赫濯聲
靈遐招携懷遠有長策莫將戰陣奇勳誇

五里茶嶺五里龍溪五里小竿嶺十里過古大仙嶺
宿廿八都自清湖至漁梁一百七十里分汛額兵千
人楓嶺營領之兼隸浙閩此尤居中扼要之地云

破壁弓刀滿村村列戍兵風高閒陣馬月冷照荒營已
扼咽喉勢還聯臂指情從來不在險草野徧干城

二

古井依山麓雄關鎖石岳犬牙全制勝鷹眼敢偷饒野

火懸軍幕郵符輟羽緘道傍餘戰壘碧影卧松杉

三

地瘠民多困時和賦未輕谿山殊陡峭驛路遠縱橫奔
走聞勞吏更番遇禁兵 聖朝寬大詔最是卹農耕

戊申是日長至五更起望 北遙叩用杜工部韻

昔年簪筆侍朝班此際衣冠接 聖顏羽衛森陳扶日
出園丘大祀答 天還光分燎火星河外香散鑪烟碧
靄間道路孤臣仍草莽拜瞻 北極萬重山

五里溪口南望楓嶺若高不可上上爲浙閩分界
只在江山境筍輿數日行四圍峯不斷一掬水猶清鑿
石螺旋窄緣谿鴈齒橫仰看楓嶺近百仞踞嵒嶭

二里鐵帽山

相傳有焦贊墓

尚說關西將蕭蕭古樹寒溪腰山作笏雲頂石爲冠鐵
棒威名凜霜袍戰血乾書生多白面謀國敢登壇

五里楓嶺南屬福建浦城縣山僧索余留題時匆匆
行未暇也下駐楓嶺營自此東南行

楓嶺盤雲峻溪流繞帶長入天寒一碧礙日曉微黃客
過供清茗僧閒悟妙香謂余留姓字慙媿俗塵忙

十里石龍菴稍南爲廟灣五里梨嶺舊有關

梨嶺矗雲表叢竹藏巘岼穿壑陟幽巘似入祇林園虬

松結成芝舞動蒼濤翻又見千尺榦朱實疑山磬

僧云血子

樹坐此嘉樹蔭頓忘塵影喧泉從峯椒落沆瀣流朝暾

下灑爲瀑布平疇連遠村坡陀踏層梯澗底飛潺湲有
石立如掌地靈蟠其根因之刻神像自昔香火繁鳴鐘
伐社鼓祭賽紛雞豚我來只覽勝祈報俱無言偶憩遐
想發清嘯留華軒

二里高波亭五里九牧亭五里廻向菴二里吳墩三
里寒橋一里杉峯二里血紫塘一里臯亭五里漁梁
山古稱天下十大名山之一有瀑布若珠簾率地建
溪信溪之水出焉過嶺地頗平曠畝成膏腴旅次宿
九牧風餘古才華世更承雲如留氏族樹亦擁高曾每
向谿橋轉偏臨澗水澄晚來山谿處孤月綴蒼藤
巳酉五里畫牆頭楓嶺營汎止此五里新嶺嶺路盡昔

江淹令浦城云碧水丹山平生所酷好何嫌僻遠余
到閩如入園林目不給賞幾忘道途之倦時乘竹兜
前仰一笠置筆研其中每得句呵筆書之晨起指凍
如槌從僕竊笑行路見者咸怪其迂余吟詠自若亦
不能自禁也

莫畏閩中遠行行境漸佳巉峯連野燒激水濺空堦果
熟霜前圃花明雪裏厓武夷聞最勝何日訪高齋

五里僊陽鎮南有揖僊橋碑記云真西山先生故里
理學閩南盛西山有舊廬鶴山同一謗真僞竟何如
十里周塘七里有橋橋上有亭十三里浦城縣自衢
州至此計陸行三百二十里遂買舟行草橋泊

忽覩橋亭麗牕含四面暉山腰紆荔帶水腹浸苔衣似
作蒼虹偃誰乘赤鯁飛過慙題柱客擬與鴈同歸

庚戌舟發浦城西門外一里古老灘一里柳亭灘四里
九秋橋一里火燒灘一里黃蒲灘二里將軍灘二里
良子灘三里九條溪

西溪寒渟泓沙石相與永欲曙霜稜稜纔絃月耿耿我
行閩山高側面看天影我聞閩水曲蜿蜒穿石穎繩牽
烟際遙箭發驚湍猛一棹從茲遊奇懷寓清景

二

曉浮蒼溪烟舟子戒勿語我亦耽澄觀默然靜羣慮惟
餘野鷗閒皎皎自來去沙平曳一灘遠指峯外樹莫辨

山川名幽討憑目遇自問占括囊三緘福所聚

三

溪回入山根磊磊露奇石或如獅象蹲或如熊豹立或如象平臺或如森列戟散爲千朶雲結作一片鐵巧匠不能斲神工誰刻畫我試問山靈云剩補天碧

五里石鼓碑三里大石溪二里紫崎潭舟人遇淺輒躍入水推舟行沙石上戛戛有聲舟銳前廣後微聳起中蔽箬篷面鋪平板僅可趺坐底形方取其穩若過灘橫一木於舟腰維以繩兩人肩之前者曳後者擁纜上則繩繞雙竹竿數匝展轉而下竿觸石間砉然冬深水涸所見如此五里西潭五里硜涯是日午

夢得泉香洗耳清句夜來枕上溪流泠泠清響入耳行止固有定也

涓涓流一寸人響雜灘聲傍石如鳧立沿沙作蟹行篠煙遮嶺斷樹靄落波橫夢亦尋幽賞泉香洗耳清

辛亥五里太平灘五里觀前入溪口船尾繫竹纜繞船一匝衆登岸引之船首繩維竿手挽乘急湍以下東岸山曰小武當瘦石雲聳古木林立頗云勝覽過此水漸深廣舟始用槳下灘用棹棹長二丈餘與柁稱隱隱霜清水鏡浮冬深景亦澹如秋携來冰雪思千頃載得烟雲臥一舟奇樹森從峰頂立細泉斜向石根流此鄉風味殊堪戀碧筍黃柑滿徑幽

五里後塘有浮橋鐵索貫之亦通陸路觀前以南岸
皆石壁清溪繚繞白沙碧樹影入波中一一如畫二
里老鼠灘山下巨石如鼠三里鎖鍊灘一里蕉頭五
里菜洲灘五里水北人烟多五里蕉溪五里曹邨
百折寒谿碧中流一艇便雲開山北向日近海東偏石
角峰腰破魚灣蟹舍連谿訝參茂樹宛轉抱奇泉水引
千邨碓畚燒幾處田高廬疎竹護絕壁古藤纏野結榛
成實園收粟似拳乍過青靄散忽湧白沙旋此景真難
繪其中隱或仙長松如吼雨叢莽欲生煙土俗神尤赫
居民禱必虔里歌陳雜舞供帳鬧華筵紅釀微添麴青
柴不取錢味知鮭菜美剖取蠟房鮮嶺帶蕉花入潭飛

橘子懸鄉言憑畫字閩紀續餘編

周櫟園先生著閩小紀

靜夜猿

聲杳晴空翠羽翩皎兮看月出冷若御風然

壬子五里松墩五里溪源三里澄源五里蓮花石三里

老虎灘三里舊館爲水陸交會處

怪石谿邊如虎臥樵蘇烟裏有人行到來古館皇華發
爲問三山幾日程

三里南岸七里塔嶺灘甌寧縣界望遠山如霧宵靄
空濛間五里大崙灘石骨嶙峋烟雲萬狀五里連甌
入舟以來偃仰不自伸眠食頓減日夜意殊昏昏也
澹澹山爲霧峩峩石似雲夕依人境宿村鼓戍樓聞

又

竟日跣趺坐登臨興若何停舟看瘦影未爲苦吟多

癸丑曉大霧咫尺不辨日高行二里龍牙灘五里小羅

灘五里瀛洲灘俗呼平洲四里大羅灘一名羅隱灘山上

有祠隱字昭諫杭之新城人子姓蕃衍邑令張容菴

瓚梓其遺集余邑吳蘭雪先生穎爲之序乃廟食於

此弔之以詩

我官昭諫里曾讀昭諫詩郊島並寒瘦劔南開清奇間

亦愛駢體綺麗餘波爲士有不得志東西南北馳同時

號三羅千載才名垂至今塗巷間詩識成口碑丹青久

寂寞遺蹟荒山祠後裔誰踵起長懷風雅師

五里苦洲五里蜈蚣灘五里迴龍灘十里龔墩三里

玻璃舖有灘七里水吉驛廟日石磯其神林公張公

唐末破走黃巢試劔石在焉水陸路至此分

水曲山椒驛路分人家岸對一溪雲英雄奕奕如生氣

片石千秋姓氏芬

甲寅大霧十里七里灘五里大湖五里小湖二里樹林

灘一里環琦灘下一石有耳二里雙門灘石多奇峭

不見青山曉濛濛烟水痕草浮沙失徑樹濶岸移邨石

影穿環耳灘形峙戟門坐看陰霧散浩蕩指甌源

又

山蒼蒼水茫茫若木未出丹霞光人言連日霧當雪箬

底危坐露衣裳起欲問天天咫尺茲遊恍入無何鄉我

懷蘇長公臨城了了見太行我懷韓潮州雲開瘴嶺觀
衡湘飄然一葉不知遠古人與我時相望安得乘風萬
里外盡掃積霧清遐荒

五里牛尾灘三里九菖灘一里牛頭灘五里小米灘
五里大米灘五里青洲二里雞心灘南爲雙溪口一
水西流入建陽境往崇安十里葉坊驛水陸路又合
石湧雞心立溪分燕尾流慢亭探九曲一棹此西游

乙卯五里青桐灘舟人登岸取柴戲爲束薪歎

緣崖入青烟腰佩搜林斧但聞響丁丁不知去何所須
臆抱薪歸新條濯宿霧嵐氣咫尺迷叢深或有虎謂我
無足驚不畏亦無阻束薪買百錢當念城中苦吾儕寄

扁舟野爨供手取因之發長歎居是山林古草木食
便奚爲事行旅

十里桃李村六里紅硃灘沙石皆赤三里北津渡二

里念佛灘有二石幢鐫佛號

舟人呼阿彌陀佛灘

五里雞公灘

五里城西驛屬甌寧南屬建安縣俱建寧府附郭

仲冬晝短曷木葉霜際落今來閩中遊蔥蔚滿林薄草
芽尚含青高柯綠如昨杉松攬雲直藹藹映丹壑地氣
寒燠殊山川繡成幕舟行三百里望遠亘城郭市喧鹽
鐵價物貨來海舶島外多珍奇車渠錦貝錯玲瓏玉西
東垂紐金絡索珊瑚徑數尺瑟瑟綴瓔珞麒麟寶花鬪
珠翠水紋箔茶時蠻人來通衢光照灼東閩居上游天

湖浸寥廓闐闐聞書聲野廬集講學我夢紫霞洲結想
昔賢樂春風吹寒泉策杖謁飛閣

丙辰大霧發建寧臨江門外通都橋久斷過石罅頗險
起來釜底憂成聲無語悠然放棹行霧勢遠垂千嶂白
曉光寒浸一溪明青錢市認元豐字紅酒樽傳法釀名
最是建溪誇茗戰煮泉燒筍候春晴

二里烏鴉灘作烏鴉行

烏鴉灘上鴉飛橫繞枝啞啞寒空鳴爾能返哺首知孝
爾能合隊成群行爾能填橋渡銀漢爾能報雨否則晴
吁嗟鴉能智且仁世人何獨憎其聲少陵亦謂無意緒
紛紛自噪難爲情我今謂爾莫妄叫須知鸞鳳音和平

更聞鳥中比爾爲曾參慎勿引喙若與人喧爭

二十里梨灘十里五馬潭五里太平驛三里盆灘
淵清底無垠衆峰迴迴列寒光吞澄泓斷石立積鐵日
高半隱巖餘靄散林缺亭午來微和始見天宇徹我行
慣海濱東指扶桑次蜃氣飄樓臺往往遇仙傑地極南
溟深山水矜秀絕錢唐千頃潮坐嘯湧冰雪闕溪萬重
烟飛灑珠玉屑輕舟如電過好景旋恐忽人生藐然寄
吹劒成一呷卽理得所欣奇觀爲我設

三里鏡鉞口十五里呂口五里蒙洲五里房村口
日暮停何處孤帆渺渺行山如雲斷續水與石縱橫小
市魚蝦味荒村鳥雀聲來晨將報蜡歲事及崢嶸

十二月朔丁巳晨起作憶去年此日在杭州前年此日
都門又前年茅山先慈墓下歲月如駛感慨繫之
朔日今年盡頻遊換物華孤山梅始放燕市酒曾賒臘
底開殘曆天南泛遠槎回思先壠畔風木痛無涯

又

北斗疎星爛西山積雪重天街寒列炬清禁曉聞鐘自
別金門友長懷石戶農年來荒學殖可愛是餘冬

入南平縣界十里三節灘三里大橫驛十五里龍孔

灘大小

十里油灘二里黯淡灘三里鑿灘亦大二里

延平府附郭南平縣

我行已值嘉平朔此日纔過黯淡灘巖巖數峰環巨壑

嶽崎千疊駭飛湍干霄紫氣龍津合夾岸蒼烟鳥道盤
廣漠風高天萬里回瞻西北是長安

延平城在山上綠山民居瓦屋鱗比岸傍有明翠閣
百角樓諸勝過延福門外浮橋爲劔潭一水西流往
邵武汀州境俗呼丁字水迤南有化劔閣

南鹽北米路西東上下灘頭任好風城遶青山山映水
宛然樓閣在空中

五里大灘望城南峰頂雙塔對峙十五里湘灘

灘二亦稱

大傷小傷

溪多木筏十里徐洋十里吉溪有公車客同泊

塔擁峰如蒜槎浮水一泓鄰舟燈火伴夜靜讀書聲

戊午五里蛇溪五里金沙灘五里葫蘆山五里茶洋自

此南行十里岳溪十里鷓鴣塘五里九里潭羅漢灘
枕上聽來十里濤日光纔並遠村高人過南國無飛雁
天接東溟可釣鼇嶺樹全低青似笠溪雲半染綠盈篙
鷓鴣欲起猶回翥北望家山客思勞

五里蛟龍潭十里尤溪口十里樟湖坂十里嶺峽南
爲古田縣界過雲頂舖秤鈎灘八里平瀨二里黃田
驛

石與龍門峻蛟沉百尺淵過溪雲欲斷出峽水如懸野
色荒荒日山睂澹澹天隨風飄下瀨獨坐聳詩肩

十里穀口十里鶯洋十里上灣口五里螞蟻灘五里
下灣口五里雷尖灘五里水口驛

一名鹽運分司駐

大抵入閩所見山多秀拔水盡清紆林木陰森蔽翳
天日蒼嵐成霧或竟日不散或連日如雨灘高湍激
奔迫澎湃嚙石根間鋒稜如鏃如攫如鬪如張爪牙
石缺止容一舟揆棹奮槳柁轉相應盤旋若飛倏忽
已渡稍緩舟觸石立碎矣舟底板薄過灘滲漏旋刮
竹皮和蠟炬膏補之頃刻可塞又往往拖泥以密其
縫有紙船鐵梢工之諺云延平以南山不甚高榕最
大他樹甚少溪愈濶流愈迅至水口水始平

水中石影簇巉巉借得輕風只半帆兩岸青山飛靄集
晚來帶雨宿西巖

已未五里白蓮塘五里飯甑石二十里安民溪五里大

閩行日記
三
箬五里小箬驛二十里閩清口十里梅坡

山遠無烟水始波南來景物似清和一帆風使船如馬
坐聽漁人鼓柁歌

十里大士閣十里新塘十里大目溪二十里白沙驛
侯官縣界十里葉洋十里竹崎所十里甘蔗洲山水
尤佳果木叢植環蔭如亭時荔子龍眼橄欖諸實俱
已盡落惟朱橘纍纍猶懸碧樹亦籬落間物色也

閩邦雄作鎮林壑更稱奇綠結榕成蓋紅香橘壓枝島
民蛙鼃食洞叟蜃龍祠海外梯航滿空山靜鼓旗

庚申十里白石頭十里古侯官治十里芋源驛十里洪
山橋又二十里南臺洪山橋登陸十里福州府附郭

爲閩縣侯官自浦城至此計水行七百七十里

丹霞海上見三山一片輕帆烟靄間我已棄家千里外
天教客路幾時還寒江遠接驂鸞渡春水平添浴鵲灣
勝似畫圖看不足詩成潦艸未能刪

自浙江杭州府治至福建福州府治共計水陸行一
千七百二十里

昔樵李李君實所爲禮白嶽記分視之各爲一則合
視之共爲一記而詩卽連綴於中分視之則詩合視
之詩亦記也詩文照映使山水神情無所遁避其間
真是合作今人爲遊記者意在謀篇終難逐境章法
固自貫串境地終未分明且記自記詩自詩使讀者

因記以憶詩持詩以尋記筆墨間隔神情不屬不數
行欠伸欲臥矣昨讀先生閩行日記用意立法與李
公所作大是相同真堪載入同書惜乎周櫟下先生
未見也

右淮陰杜首昌湘草詩話一則

從來紀行者或以記或以詩卽兼有之又多雜揉不
可辨余友魏蒼石刺史從武林來著閩行日記以月
日道里爲綱以詩爲目一展卷而經緯分列燦若列
眉就詩觀之記如詩之有題就記觀之詩如記之有
解有贊遂盡紀行之勝見者嘖嘖稱記似酈道元水
經注詩似杜少陵秦州入蜀諸作余亟授之梓爲閩
山水得有知己以爲快焉同里同學弟吳琇謹識

域中山水最奇險者莫如閩與蜀然三川地處形勝
酈氏水經一注言之詳矣迨少陵入蜀諸詩則曲肖
其情狀卽五丁初闢時神工鬼斧不自知其所以然
者一一刻劃無遺也閩僻在一隅遊屐罕至其谿山
之峭激阻絕僅見於淮南諫伐閩越一書而文士才
子間從其耳目所及形之賦詠簡而不核詳而弗韻
匪盡才短亦由激湍折坂動魄驚骨弗遑於佳處領
其要耳溧陽魏蒼石先生負白蘇之才復出爲西湖
太守顧以憂讒畏譏涉冰雪而入閩宜其中有拂鬱
不平視一切名勝皆無足抒予懷者乃於奔車側枕
之際作閩行日記沿途所歷計程刻畧各系以詩詩

系以記旣擅道元之奇奧復兼子美之昇兀非其天
才敏妙胸襟怡曠安能於一涉之下寓乎目而卽成
乎文母亦山水之精靈久湮鬱而不得舒而巧憑於
文士才子之腕以自獻其情狀與予閩人也日經涉
其中而不能出一言以發其奇讀是集真覺有君才
倍丕之歎矣皆

康熙辛未花朝前五日晉安年家弟謝天樞謹跋

閩中吟

芝山開元寺

溧陽

魏

麟徵

蒼石

上山尋紫芝左右若兩峽礎紋苔花乾幢影碧空插層
臺古佛尊跏趺被白恰座底無寶蓮翻如在石硤現此
丈六身說彼大千法遺刹稱開元藏經閱朱匣金簡綠
字編玉軸牙籤壓我來登虛堂香鐙雜梵夾數僧冷荒
厨傍舍擾鶯鳴爲言兵燹過地脉殊耗乏靈源閣已燼
瓦礫餘畚鍤常年天氣暄深冬便單袷今年多冰霜木
落水泉狹雪披白鳳毛雲簇蒼虬甲居此未及旬閭巷
漸歡洽偶值鄰翁談情同野鷗狎海邊日易曙差擬熟

羊腴空谷貽好音清風拂吟筴歸時語親串奇勝邁茗
雪

城外訪梅不見

欲問寒梅寄所思城西十里步遲遲我如雪夜孤舟返
君似閉門高臥時

鐵佛寺

閩王昔強盛聚鐵數萬石鑄作辟支像表在靈山額下
有不測淵云是毒龍宅佛座曾半欹移見地底坼銀塏
小峻嶒古錢色成碧餘物備五行鎮壓及符冊衆駭爭
取觀怪風莽飄孽依山十三井一一水泉溢瓦屋盡翻
傾木拔根株折卽時還故處龍未起騰擲鑄鼎象神姦

物理自當格川鎖巫支祁淮渦有遺跡三山不可見茲
竝芝山脊鐘山亦結廬培塿只數尺

高子固齋舉曾孫淮陰杜湘草名之曰愈曾詩
以賀之

君來遲謫降三日蚤能言

固齋離母腹三日方
生生三日卽能言

是父有

賢子如公羅衆孫曾枝生鳳羽異筍拔龍根鬱鬱占佳
氣克閭自德門

著述龍門老經傳世學深長男仍得震此子吉逢臨

月爲

臨帖笑書璋誤弧懸畫戟森試看頭時玉何用聽啼音

詠白鴈

方在燕太學園中所畜白鴈野人羅而鬻諸
市不售將就烹矣展轉得之陳紫巖孝廉作

詞二闋紀其事余不好填詞賦詩和之

白鴈來何處霜前故國秋思將關月冷浴向海雲浮夜
落冰成字冥飛玉是儔相看形影潔豈屑稻梁謀
榆塞七千里皤然帶雪風蘆花迷水曲木葉響厨中幾
作不材棄能鳴徒自雄主人憐竝鶴待爾翮還豐

冬杪集林草臣齋頭卽送之遊毘陵

詩派驚傳近日分蛇神牛鬼鬪紛紜閩中集有真風雅
友古心如醉典墳椀淪茗香凝曙雪樽浮花氣撲春雲
歲闌一棹江東去悵望家山隔鴈羣

除日登越王山

一名平山

平山如障擁城隅指點園亭入畫圖峯割龍腰蟠北郭

堞翻雉影插西湖石痕半作丹沙篆海色全浮碧玉壺
獨上高樓看萬里舊聞何處訪無諸

山有樣樓

閩中除夕

流華默數手中著獨在天南閱歲時畫袴蒙皮喧侘子
緋衣假面任嬉兒聽殘臘鼓催三點坐對寒燈守一卮
四十年來非已昨街頭那用復賒癡

辛未元旦遙叩

闕復叩家山二首

得回字

五更蚤上越山臺遙指燕雲北極開秘祀先春乘玉輅

天潢就日進金罍

是日詣王獻席

鳴鞭影動千官立獻表聲傳

萬國來朝罷從容承

賜宴彤墀列坐醉方回

將曉星輝燭滿臺家山隱隱望中開天從午夜交新曆

人酌辛盤憶舊壘九九塗鴉銷臘去雙雙畫燕貼春來
承權自昔逢茲日綵袖爛斑舞幾回

佛手柑

碧樹黃柑種特奇結成千手映纍纍香分玉指如蒸栗
淨擘金房類采芝仙掌露凝秋熟後佛光風定曉圓時
維摩散得花皆實舞作空中大小垂

陳紫巖園居三絕句

庭開半畝一方塘竹石無塵徑有香喬木世居成幕府
只移書卷與繩牀君舊第爲都統所駐
已補檀弓原物始更嗤爾雅注蟲魚投壺銘詠真佳絕
自是胸中富異書

勝畫偏於荔子宐火蒸土暑爍金枝

君譜荔以勝畫鄉爲第一立秋前後

三日

吳儂未識冰肌滿却羨西園醉擘時

西園擘荔見倡和集

烏石山獨遊者再山半風高其巔未及躋正月

三日藍子公漪枉顧輒與偕遊從蟠桃塢入

石天稍憩卧乃起讀薛壁間宋元人題字過

薛老峯忽見淮陰杜湘草同一僧自峯際來

遂共登鄰霄臺絕頂留連寄眺是日雲開日

霽春氣盎然遠樹無風澹烟如埽環視郭外

諸峯劍立閩江綫長天與海涵曩碧無際公

漪所居近在山麓衙門數椽尊人笨菴先生

年九十二母七十餘眉齊健飯具慶在堂坐

公漪小齋閱名公卿贈貽詩畫覺琴瑟書策
間隱隱有金石聲茗椀酒罇芬潔可愛余連
引數十卮輒醉時杜以他事先別僧亦去茲
遊暢矣歸而紀其大概如此

登臨時獨往濟勝喜相依石隱仙人塢山當高士扉問
奇書滿架色養綵爲衣我媿茅容客春風取醉歸

烏石山

雲垂山外山坡陀山入雲內雲嵯峨蟠桃石根穿青蘿
天章臺古奔羣魔响嘯碧篆文流波金蟒穴開神靈呵
懸崖題字紛擘窠苔蘚繡蝕冰霜磨泐池浴鴉如盤渦
鄰霄絕頂驚飈多吹立海水翻銀河織女下視拋龍梭

扶桑之高高幾何

人日集彭石鐘于山堂分得霞字

人日同人覽物華乍逢新霽曉飛霞牕間海碧橫鼇足
檻外峯青蠹虎牙味入春盤香菜甲杯浮臘釀影梅花
歸期鴈後鄉思發寄訊題詩醉墨斜

穀日集杜湘草寓齋用門字

通德先生舊里門

時在鄭孝廉宅

浣花老叟憩高軒相過雅勝

西園集列坐爭空北海樽爛熳梅開將結子平安竹報
欲添孫草堂竟日娛清賞昨日題詩得細論

二

人日纔過春氣暄我來屨已滿當門縱橫筆陣驚豪蕩

陶冶詩才見本原結得桂叢招舊隱折將楊柳調新翻
是日填柳初新一闋客中愛客情如許一斗醺然感醉髡

三

榕城三至問名園錦繡灣前荔子繁烏石一拳山作礪
螺洲幾曲海爲門人皆望歲占宐穀我亦忘憂學佩褱
此日春光真澹蕩莫辜好景若輪奔

四

閩南山水闢天根不辨雲痕與石痕斗極雙丸浮海嶠
晴空一髮指崑崙耐吟自可耽三雅坐隱居然擬八門
便欲從君丘壑老十年以長道猶存湘老長余十歲

五

日日清齋飲瓦盆何來瓊菜入盤飧黃柑雅佐新年酒
綵勝還簪昨夜旛每出商歌金石韻別裁詩史布衣尊
歸時恰有初弦月引我春風直到門

謝星源敢園疊韻

閉戶先生道自尊歸然一室著書存燃犀蚤奏神君理
駟馬還高舊德門蕊榜蟬聯今九葉芝庭鵲起又諸孫
羨君不獨家聲大大業名山地討論

乍操布鼓過雷門聞昔陳書入帝闈象郡風烟開遠

瘴慶遠司理麟經燈火守微言世肆春秋令子大書特書皆舉于鄉田廬未及

多文富里巷能傳薄俗敦曾讀射鳥樓上詠敢園心膽

自堪捫周櫟園先生留寓敢園

九仙山

閩城之中三山藏鼎足北峙稱越王東南九仙特奇曠
 欲挾薛老騫雲翔烏石山有薛老峯左右鉤角屹相向儼然箕
 舒與翼張傳自無諸宴重九窪尊石畔寒花香若爲仙
 真秘此宅萬仞絕壁撐霞光鼇峯直上嘯臺起崢嶸飛
 閣留丹牀坐乘九鯉升白日天風鵬海俱茫茫我如退
 之猶倔強不肯學仙矜荒唐謝爾間行過山麓膠庠鐘
 鼓聲嗶嗶

集鄭蹇翁齋中讀令子千旅擬古詩仍用門字
 稜稜風節著監門繪就流民涕泪痕曠代此心殊未泯
 後來餘澤至今存卜居人愛閩山靜遠俗天懷古道敦

少負盛名堅不出書空久已鄙深源

二

古巷能辭車馬喧素心方許扣衡門墨香筆冢藏書蹟
 花片苔關斷履痕五色雲占人是瑞一堂星聚德兼尊
 首春風物斜川好城市如遊谷口村

三

庭傳詩學自晨昏格有黃初正始存愛爾體裁歸大雅
 陋他知解悉傍門數行韻愜神飛動幾度篇終氣混侖
 已是熟精文選後還從三百究淵源

十三日王養六留飲卽席用其語爲詩

紅燈如隊滿街看爆竹燃薪照夜闌上彩雞烹新入饌

聽更魚多舊堆盤碧霞酒映梅花煖綠雪茶澆橘子寒
此日人暄元夕近廿年踏月記長安除夕所烘藁魚日聽更魚

高斯億太學生孫彌月仍用門字兼示令子山

表

纔過家慶幾晨昏

五日前尊公固齋初度

綵舞當階已抱孫彌月

恰逢華月滿長春忻得蚤春暄文如吏部稱醇肆志有

沂公忘飽溫

孫名愈曾

錫爾嘉名從繡褌佇看戈印試侯門

朝來賓客喜闐門公望公才見此孫桂魄乍圓珠有彩

蘭牙初茁玉為根星橋五夜笙歌徹火樹千家笑語溫

待似文成能跨竈八旬堂上更開樽

固齋八十時當見曾孫弱冠也

福州燈詞用門字十首

結成臺閣到雙門

獅子樓東西門曰雙門

燈火連宵慶上元花榜

今年誰第一璧人旖旎月黃昏

南臺前夕試燈幡上彩今看出巷門

南臺十一日張燈十三日日上彩

當境悅神華燭滿清歌檀板對金樽

後街燈市爛迎門幾幅冰縮水墨痕更比料絲珠串好

休誇剪綵綴銀幡

打來燈謎雜方言嚼酒三更坐正溫踏月少年欣結伴

又聽絃索過津門

唐羅城南曰通津門今遺址為津門樓

泗洲文佛半閭門最是侯王香火尊

俗祀僧伽及齊天聖何處紙

簫聲一縷

紙簫見閩小紀

吹來芳氣繞蘭蓀

嬉遊陸海似雲屯百戲魚龍錦浪翻

市多龍燈從以羣魚莫艷泉

男勝化女

俗稱泉州男與化女最佳

珠娘深自斂重門

雙鬟屣響虎鬚掀

婢著屣前綴綵線如虎鬚以厭虎山之勝

不看春燈向市

門製就新衣隨刺繡踏青那更識芳園

秧歌花鼓逐塵奔撲地香風舞彩鴛萬盞玻璃光不定

橘燈隱隱照榕門

烏石山腰雲出門越王山脚月來軒爭傳新樣鼇山麗

人擁閩山廟名古樹根

觀音橋畔衆兒喧各誦詩篇勝負論

橋南北小兒對立背誦唐詩多者勝

舊米倉前聯句巧寫將時事榜臨門

燈聯所在有之惟此巧用時事

贈何曉亭疊門字韻

舊南川令

獻書蚤已達金門第五才名世所尊獨去西川携一鶴

歸來彭澤醉盈樽鬚眉冰雪神同皎揮灑烟雲思不煩

我幸追陪文筆侶三章祇恐笑虞存

扶桑海外見朝曦自昔天池化巨鯤我誦鴻文三十載

人瞻紫氣五千言南川秔稻留棠徑東閣梅花繞葦門

載酒相過多問字坐延華月照芳樽

道山園亭題爲陳茂才君浩

高齋卜築道山偏石罅雲根一徑穿檻轉碧分榕樹老

牕開紅結荔支鮮雙峯夕照層層捨萬井晴飛細細烟

湖海元龍豪氣在樓頭百尺且酣眠

贈同年楊允大

憶昔丁未歲大比再用策論試取士亦如甲辰減半額

一百五十人而已南宮榜後曲江遊籍籍聞南稱楊子
君讀尚書我讀易相詢里居及年齒君師海鹽查黃門
我師海寧陳太史選拔庶常習國書例取才望少年美
君時三十鬚眉蒼同我簋棄若糠粃君還榕城我秣陵
廿有五年於茲矣屈指百五十人中或貴或罷半已死
別後我曾趨紫薇君獨棲遲戀桑梓幾年兵火話酸辛
聞君遽已退不仕昨歲過我西子湖俗冗蝟磔念倒屣
君登泰山觀日觀我已去官返吳鄙又因案牘走閩南
雨雪載途君歸止昔寓慈仁寺內松濤聲謾謾清兩耳
只今松榦盡摧殘况是黃金臺久圯相期何必彈舊冠
愛我素心交似水

和陶靖節飲酒之一

浩浩萬感集一飲能空之元化邈無端草木變四時撫
景日以異遣懷良在茲進退心已審欲筮亦何疑只可
酌醇酒微尚夙所持

二

嘉卉長幽谷好雲託空山歸耕日守樸息機拙無言前
者見千古後亦當萬年物外有真意非能金石傳

三

山水不自語絲桐寫其情不如本無絃古音難可名泠
泠石間溜藹藹春雲生虛懷入澄觀剝啄誰復驚嗒然
非有想夢遊偕廣成

四
林端辨初旭衆禽鳴且飛得食不獨喜失侶殊自悲野
人餉卮酒念我情依依此日爲君醉此意澹忘歸青青
雪中松未因嚴寒衰之子慎素植心跡幸無違

五

城市豈無隱巖谷亦有喧此心渺如寄不在境獨偏暫
息塵中廬高卧爲深山客至輒與飲酒盡客亦還相過
各已適相視俱無言

六

天地何終窮山川古如是朝華夕零落倏已成復毀營
營百年身不飲徒然爾毳褐幸得完何羨錦與綺

七

白露綴秋色湛湛寒花英晨出每不歸獨往引遙情三
徑計已就一壺時自傾傍舍孤雲斂繞檐羣鳥鳴歲序
忽易邁醺然樂吾生

八

攬鏡見華髮已非少年姿對酒若不飲空負東籬枝大
義了可解那更求神奇善飲豈必醉獨醒亦何爲濁醪
妙理存不受塵俗羈

九

夕松吹風入曉菊叢烟開結廬繞幽色清樽照高懷讀
倦懽此飲孤吟興靡乖水靜魚樂泳林深鳥恬栖飛花

或在茵飄絮或墜泥卽物隨所遇安能與俗諧不醒寧
辨醉旣悟方知迷吾今已種秫獲取西田回

十

柴桑有酒人出游東林隅誰遣白衣至携酒當中途忻
然對之飲此行非饑驅昨向北牕下一枕清風餘遂已
謝熱客意與羲皇居

十一

達生理則殊因物已見道萬彙各含情穉壯亦易老我
本山澤臞行吟類枯槁不知人世間何者爲美好澹然
一無嗜此身有殊寶遐舉意已仙豈必出塵表

十二

卧起日未午流觀衆芳時朋好謂我飲斗酒前致辭東
臯且登嘯寄興及今茲形神旣已釋對影無相疑浩歌
蚤歸來身世兩不欺醴清亦稱聖聊復一中之

十三

我讀山海書寓目得奇境廓然五柳間日夕忘醉醒僕
倦睡觸屏呼起勉引領著文常自娛真氣散茗頴終謝
南山豹霧隱競彪炳

十四

文章道之餘妙語見神至興會適有得洛咏不厭醉曠
覽星辰列山川各躔次古來多賢達寧必知希貴理本
如菽粟食飲可尋味

十五

去家三十年我里久無宅少時所栖遊俛仰若陳迹家
貧舊蓄書存一散已百安能營糟丘引滿日浮白興盡
飲不多分陰自足惜

十六

野性飽藜藿何所用食經樽中幸有酒良會促膝成從
容藉談笑月上知初更涼露下檐際花影流空庭君去
我當眠聽此松風鳴都忘客主禮往來無恡情

十七

遙遙千載上歎息聞高風徒令後世名不如此杯中山
林異廊廟窮者不媿通得失見已泯渾忘楚人弓

十八

閒居靜無營忘言意已得一爲物所遷滋慮成大惑連
雨耽獨飲停雲望四塞渺渺江湖波風景暗鄉國未敢
縱酣呼時還守其默

十九

古人詠曠懷今人擇廡仕迨此知非年用法自繩已夏
蟲難語水違時固當耻乞食歸園田移居近栗里無懷
葛天民歲月遠莫紀獨坐留斟酌任命安退止君看陌
上花芳華那能恃

二十

秋冬氣高潔豁然天宇真方春細縵始萬物資化醇常

懷古田舍良苗與時新昔聞桃花源先世乃避秦子孫
此中居境僻迴絕塵豈爲神仙侶雞黍留殷勤村中咸
問訊質樸情相親漁者終自迷一歸忘去津我愛醉鄉
遊不韞亦不巾但當戒泥飲酒中多忤人

二月七日有感口號

乍逢人日喜新年又數今朝二月天憶我生初湯餅會
醉歸客散小橋邊

家居瀨水水雲東花信纔傳第幾風所悔年來無一是
却教弧矢念桑蓬

捧讀遺書手澤香銜來栢棧語蒼涼蹉跎半百韶華逼
此日劬勞感更長

天上午昌先五日

二月二日傳
爲文昌誕辰

後來五日便花朝請風

送雨家山祀明日春盤凍未消

俗以二月八日祀祠山
神時有請客風送客雨

三十生辰瞻

帝闕

辛亥生日
引見授官

去官今日走天涯中年

自愧成虛度未報

君親鬢已華

自題閩山清眺圖

烏石山有蟠桃塢余自入閩野服草屨時時
獨遊裴徊登眺者久之當烟雲忽開旭日初
上天濶海空心目俱曠不知身在何所矣撫
此嘉辰况兼好景未得枕流漱石且同澤畔
行吟遂覓友人圖之庶幾神似謂宜置此子
於丘壑間也辛未花朝

脫帽露頂者誰歟草衣溷跡如樵漁獨立萬仞石壁下
苦吟手燃鬢鬢鬚此行栖栖何爲乎不與朝市人爭趨
儼然山澤之清臞褰裳欲往企霞舉蟠桃結實千年餘
天風忽起捲雲霧羲和捧日乘飛車飄飄海上三山想
豈遜五柳歸來圖

大中丞卞公初度二首

海外風烟靜不驚清時開府暇談兵龍門蚤擅千秋筆
虎節長當萬里城島列帆檣勤入貢山連旗鼓奏升平
試看魚鳥游翔處盡向陽春譜頌聲

越水吳山德正長特頒節鉞撫閩疆芙蓉衣上仙雲繞
荔子樽中瑞露香八座蟬聯齊斗極一庭龍友擅縹緗

尊公總制滇黔公
同懷五人皆善書

黑頭公輔從茲卜鈞鼎調爲玉燭光

壽吳越石二首

洮湖春水映蘭橈二月鶯聲報柳條新漲一泓沙是堰
長隄幾折甃爲橋鳴珂里接嘉延近製錦堂成世德遙
我憶舊遊登瓦屋

瓦屋山名

良常仙侶坐相招

君家世父守潮陽持節閩南樹樹棠自昔巡行留愷澤
於今治譜有輝光官方最重爲人牧經術何曾與政妨
桃李春風開欲遍九仙佳醞入霞觴

觀察使平州張公讀禮歸士民詣臺請留公不
可送至困關皆涕泣不忍別公爲勉遲旬日
猶有送過浦城者作詩紀之

于公來治獄執法世稱平淚滴閩山滿心懷淵水清本
仁爲孝子失怙盡蒼生時向春江上遙遙拜去旌

後爲閩
臬憲

公父
子前

送黎約公茂才

約公爲魏曾弟道存州刺史子
魏曾子質扶舉辛酉北關詩經

憶昨同遊選佛場難兄入毅喜眉揚鴻文今識琳琅貴
解額偏遲姓字香師友家傳蘇氏集淵源世接晦翁鄉
天池暫息如雲翼爲待乘風到玉堂

萬壽節北望遙叩二首

草野難忘

聖主慈天懸弧矢拜恩時臨軒策試春旂

簇繞陞臚傳曉漏遲

殿試於萬壽節後二
日臚唱則後四日也

法酒霑從

珠露釀仙韶聽傍綵雲移微臣莫上千秋鏡願進幽風

無逸詞

紫薇十載舊爲郎曾侍螭頭拂

御香劍佩千官齊獻

壽車書萬國儼來王春深禁柳和風滿節應階莫化日
長野外呼嵩何所祝屢豐年與德無疆

黃岸園贈田詩冊

廉吏而不可爲而可爲今於黃公乃見之公以經術宰
百里斗大一邑名盱眙居官數載忽解組悠然徒愛淵
明卮種秫二頃已無地故園三徑遙難歸盡室十餘口
啼饑號寒泗水潛士聞廢卷長嘆息農夫輟耒成歔歔
行道遇之察憔悴或爲嗤笑或詆訾公之意中落落不
苟同一時時猶物力未凋敝行已清濁間豈盡戕民脂

公曰吾之赤子弗忍欺善事上官弋名譽私臣不忠忠
不私守此素心之貞白寧處鬱鬱懶與世相宜吁嗟巧
宦何不有膏腴萬畝供鮮肥歌兒舞女權未足又營臺
榭爭芳菲公本澹定自無欲萊蕪塵甑何由炊遂有將
軍慷慨敦古誼贈之以田供耘耔旅貧牛種那能得二
三好友勤解推一年計望秋有獲誰料荒旱苗枯萎廉
吏之命至此其窮矣固窮君子安所辭忍饑且復待來
歲有田詎終悲流離公也襟懷殊坦率每得佳句忻掀
眉我今因此勸民牧勿云廉吏不可爲謂余不信請讀
諸公所作贈田之歌詩

邵元朗太學同和蘇長公湖上夜歸韻

閩山突如削閩水激以長莽莽海雲起曠蕩高風涼君
來趨庭始烟樹迷青蒼懽然侍色笑跬步何能忘讀書
紫薇省花映几硯香觀物踵絕學南陔詩補亾尊公佐
名藩惠澤流洪塘喬木仰佳蔭下有依林麀君才亦若
梓聞博記更强愛君乃國士史筆行稱良

閩縣侯官蔣徐兩少尹

二妙真相得閩南喜見初哦詩依古樹質酒剪新蔬地
接絃歌舊蔣曾宰
甌寧家傳帶礪餘徐爲閩
王後丞乎殊不負鬱

鬱意何如

戲爲東閩揚歌

閩人士題其文豪曰
東閩揚集意有在也

讀書豈爲黃金屋欲向東街謀卜築讀書豈爲千鍾粟

却羨閩田多產穀讀書豈爲女如玉偏愛揚州好粧束
竹牕青火工揣摩得此三者願始足聖賢道本在傳經
徒借虛文博科目一朝快意無不爲那能恬淡安真樸
勸君勿思東閩揚忠孝大義古所勗

曇花和杜湘草韻

花本西域種方萼時如合掌傍有一瓣畏之
如鉤形封緘甚密漸開先垂一線開時紫白
色凡六出心亦六莖一花數十朵次第
開開後薦而不落一跗承之如臂然

花來西竺古名曇幽賞寧同俗眼貪彩壓春雲芳勝纈
神分秋水淡於藍丹房品出皆成六紫玉函開疊是三
一臂欲擎初日上淨香曉滴露盈籃

鄭千垓生日

浣華晴日曉瞳瞳五色雲生碧海東安上繪圖知世澤
不其書帶本家風美人正映蕉花艷時美人
蕉初開嘉客初占

荔子紅

荔支有
嘉客紅

大雅登壇年未壯玉階彩筆氣如虹

送漳州司馬齊誠菴改臺灣

閩南形勝近如何舩趁風從島霧過昔屬紅毛爲外藪
今看滄海久無波樓船不用勞楊僕車蓋猶嗤勸尉佗
暫此濟川需作楫還從天路聽鳴珂

張仲華招飲烏石山房

山濃如畫本全真一氣峻嶒遠市塵樹缺城樓雲去補
山前有
射鳥樓泉飛石壁雨來新高栖自可藏名士小築居然
解避人坐久傳觴分翠色觴令用
翠字閒看花鳥亦相親

張觀察贈高固齋一鶴二首

皎皎瑤池翼孤飛迥出羣骨清常比雪影瘦乍疑雲雅
稱幽人侶奇從仙客分乘軒何足貴鳴向九臯聞
豈是青田種携來碧海濱丹成殊不偶玉立已如人一
自依清獻偏宜贈養真遺安池上韻遺安固齋
草堂名時與暗
香鄰

南臺三絕句

釣龍江畔是南臺估舶如烟海外來金比上杭街市好
竹崎人去趁潮回
萬家烟火出青谿晴日街頭只踏泥風卷魚腥行撲鼻
呼來小艇大橋西

低鬟柔艣發聲遲口作蠻謳韻自知東向乘潮輕一葉
鼓碇山下日西時

望鼓山

茫茫海上欲尋山竹杖芒屨那得閒晴雨陰雲看不定
高人只在翠微間

過茶亭

松濤散入午陰寒石磴層層鳥道盤更欲振衣千仞上
上方鐘響落雲端

爲霖和上方丈

師今住鼓山心亦本無住時見山中雲乘空自來去
華藏室閱藏經版畢度小嶺得千佛菴

千佛名經古函從石室開峯頭雲萬疊片片落香臺

從喝水巖遊石門酌湧泉坐水雲亭址亭一名鳳尾

水斷巖分石逕紆涌泉澄碧浸冰壺亭荒鳳尾餘空翠

一個峯頭一鷓鴣俗傳一山一鷓鴣

入靈源杜湘草坐羅漢橋見待答韻

行遍山隈更水隈洞門深處長莓苔不教樹色雲遮斷

時有泉聲風送來隔嶺鳥衝青靄出過橋僧背夕陽回

靈源題壁多名勝面面芙蓉插磴開

藏經堂觀所貯舍利因往尋舍利窟未至冒雨

歸

佛骨函同梵字經寶光長映水晶餅拈花不盡傳來意

擊竹還從悟裏聽露滴蟻巢懸古樹蟻巢如斗大懸樹間雲封鳥

壙傍孤亭山有八哥壙欲探舍利山中窟一雨霏微徑已冥

與湘草聯句未竟而別復成一詩

偶來蘭若寄幽栖攤飯徐行遶澗西雲過峯腰環似障

雨飛石角瀉成溪空林果熟窺松鼠曲磴叢深響竹雞

百尺摩崖苔蘚合擘窠還認舊時題

劣崩峯

夢騎獅子上巖巔手把雲中十丈蓮石鼓聲聞俱已靜

持來半偈滿諸天

誰人獨立最高峰呼吸能將帝座通海碧天青原一色

濤聲幻出四時風晦翁題天風海濤字

亭亭天際躡飛霞幾道泉分瀑布斜下界林中何所有
半聞榭葉半松花

泉流洞口海潮聞行入天門草木熏夜半龍湫飛作雨
鳳來浴起一池雲

鼓山銘

山若鼓石何聲位威膽首東瀛右有旗當崢嶸山則靈
鼓不鳴石不爛天靡驚鼓山清闔海平

鼓山吟

石則如鼓山則有虎虎不畏人人亦無阻
寂寂鼓聲屹屹山名天風吹衣月白江清
水何澹澹樹鬱蒼蒼山中有入默坐心香

山頂墜石厥聲如雷靜亦不聞鳥鳴花開

鼓山六絕

上山下山兩院東澗西澗一泉古刹猶懸宋額師名預

識唐塼

見鼓山志

日誦華嚴一卷老僧獨結茅菴龍出時時聽法悟來飛
剩空潭

空外香鑪飛至云從黃石穀城刊木遍題兩字墨痕削
去偏明

青留屋角銀杏紅染山頭杜鵑芋菜名聞隱士薜蘿跡
見神仙

天鏡巖窺皓月石門路引青霞忘歸漸入真境汲水閒

供品茶

卓錫峯回平楚鉢盂亭繞松關聞說梅花勝絕幾人踏

雪看山

高子固齋有
鼓山看梅詩

鼓山看雲海用蔡君謨學士韻

山高含太虛雲海盪心目初起銜遠帆風吹過江麓縱
橫連層岡森漫平岸谷蒼然一氣浮東峯失茅屋天光
沉蔚藍雨脚立銀竹舒卷空中遊那有塵影觸觀化浩
無津飄飄想遐躡清映萬頃冰倒挂千尺瀑還疑雪滿
山何處尋黃獨奇勝得未曾寄眺興已足

白雲堂坐雨

木魚粥鼓六時分霧滿山中半似雲寒借老僧閒破衲

題詩滌筆對鑪熏

留別爲公

昔聞鼓峯之高高插天俯視塵境毫芒然叢林所在半
天下一一皆可尋其傳茲山闢自靈嶠始毒龍之宅爲
之遷紫衣興聖神晏
師號主講席遂令剎寺名湧泉開士八
十二代後則有永公振起於斯焉今公永公弟子也弱
齡求悟勤且專蚤領如來三昧印神識妙解誰能先齋
堂日聚數千指珠林法鼓開雲烟問公說法何所說使
人各見本性若盂水之方圓我生已受孔子戒不敢逃
去飯竺乾胡爲乎來更留滯儼與是山存機緣因而登
眺四五日每入方丈聞微詮聖箭重城去未遠通霄有

路恒當前神晏師語佛氏乃不妄語者淵源要旨誠相沿曩者受之今者授宗風遞闡弘仔肩願將策勵付高足法門龍象殊翹虔獲見本來無物意米熟久矣須篩便我覓安心却何往豈及此地栖枯禪

出湧泉寺行至白雲解院

山鳥報新晴山風送我行茶旗過雨碧竹筴取泉清石溜千崖潤雲鋪萬畝平白光天際湧飛出午鐘聲雨餘雲氣澹山更澹於雲遠近千峯積參差衆壑分亭空書竹影壁古繡苔紋最是園梅好無花夢亦芬

別鼓山却寄為公

山色回看步步佳白雲鄉裏一高齋餐來野飯消清課嚼得寒泉浣素懷海外奇供丹樹種嶺南香送紫蘭萼遠公若許遊蓮社粟里風流敢與儕

五日觀競渡

紅榴如火映青蒲江上猶傳楚大夫日麗綵絲搖繡虎風輕旗鼓鬪飛鳧舟名懷沙豈抹忠臣溺競渡翻成孺子娛我讀離騷須痛飲湘雲漠漠問天平

答杜湘草贈行之作兼別閩中諸子

勝地難兼勝友緣品花酌酒自新年君來共曳登山屐我去孤乘上瀨船只可楊梅誇競爽那能荔子嚼初鮮西湖烟景難拋却何日吟同放鶴篇

舟中望武夷山

武夷山色畫中看九曲蒼深石骨蟠徑引危梯雲似削
泉鳴飛瀑雨添寒仙舟自可藏丹壑精舍偏宜帶碧湍
天柱一峯臨絕表勝懷疑向幔亭寬

余以庚午臘至閩次年五月去吟橐積笥中刪之尚
百餘首寓芝山從高臺上挹九仙薛老諸峰之勝過
友人飲酒劇談以自快望鼓山在城東三十里外雲
氣往來虛空飄飄作出塵想高子固齋杜子湘草約
同遊未果四月下浣余獨往尋白雲堂則湘草在焉
固齋前六日歸矣讀山志偕爲霖老人茶話頗稱韻
事及入城而檄促返淞終以未噉荔支未登武夷爲
憾人遇名勝信有緣哉麟徵自識

許田莘野

去冬吾師遊閩嶠徧訪名區窮奧突紀勝詩篇到處畱
紙上神工擅奇峭旗鼓相當形勢雄陟巔望海通洪濛
九仙烏石屹相向無諸霸業沈西風吾宗冲元盛文藻
歐陽一見敦紵縞元祐傾擠賴護持原豐遺老猶能道
吾師憑弔歷間關榕嶺勞人去復還重過明湖值長夏
傲居精舍俯溪灣恰逢梅雨成行潦銀海欲翻波灑灑
雲擁雷峰鳥下遲烟迷葛嶺僧歸蚤慚愧侯芭學未成
師門容我鄙懷傾塵揮臯比青松代酒瀉樽疊綠蟻盈
撫掌高吟出金石頓使山靈動魂魄西湖闢水似奔濤
欲爲吾師舒憤積豈知冰雪貯胷中彭澤休官惜酸空

單舸徑須卷石壓空囊寧借一錢充勾留未遽思鄉井
業就名山心耿耿不使分陰白日馳常教寸管烏絲騁
一編在手百憂蠲近作推敲句句傳詩律老時矜鼻兀
文心澹處發孤騫為說從今筮艮止著書不顧蒼生起
願依杖屨久親承負笈何須憚千里

盛弘遠 紫翰

吾師蘊負足經術十載西清曾珥筆才華璀璨重承明
一麾出守循聲溢潁川神爵集林叢蘇白風流復見公
飲水矢操吏民惕花村蔀屋皆春風吞農時稅桑田駕
更重甄陶宏雅化謏劣應慚侍絳紗品題驟使增聲價
含沙偶射萬姓驚傲屣一官無不平借寇何從一郡泣

師云自此吾身輕留連詩酒恣疎放寄情文史殊跌宕
傲兀肯受塵鞅羈扁舟自號西湖長從茲緬屐捷如烟
南走閩嶠樟谿邊三山奇境任領略歸時圖書載滿船
重來湖上三春後桃花落盡餘深柳儼居雅欲近湖濱
淪漣庶洗眼中垢壘塊何妨白墮澆伴侶只合青山招
此中空曠若洞壑醉弄筆墨騰潛蛟丁卯詩人偶還往
謂許子莘野開樽抗袂窮象罔贈以文石兼法書李郭仙舟
成互賞恨余臨水來何遲道逢我友乃知之襟懷浩落
歎罕有昔惟坡老今吾師

吳陳琰 寶崖

紗帽山人賢使君面湖小閣坐論文 西湖有紗帽山一先生儼居其下

官輕棄隨秋葉萬事翻新看夏雲病不廢詩才較健貧
仍愛客飲常醺天教石屋勾畱住歌發驚猜麋鹿羣

夜月朝烟罨畫圖諸公衮衮幾曾娛不嫌南國美人盡
只看西湖天下無雁齒橋紅雙屐近鴨頭波綠一舟孤
編民若訊閒居課蘇和陶潛我和蘇

誰云絕調繼難工君是前身玉局翁豈但文章誇海外
蚤聞官事了湖中仙才有數真堪敵禪喜無言偶不同

先生不喜談禪我愛後先風雅主一編好障百川東

部下閒人疎嬾多選樓謬許問東坡命余選蘇詩行世故交應

覓方山子時論無勞春夢婆磨蠹半生消濁釀泉源萬
斛散狂歌不妨盡付雞林賈弛禁而今似政和

趙沈壘 漁玉

記得前身是大蘇重携手板領西湖行蹤歷歷皆如契

天意茫茫不可呼計俸何嘗六百日摛文直欲四三都

葑田已滿憑疏濬論狀猶堪佐 廟謨 先生議復湖隨去不果行

龍門百尺自干霄朗鑒寧遺爨底隼市有懸金方購駿

人思鼓浪恰吹潮 余賦錢塘觀潮最蒙見賞一經賞識能增價重辱

吹响得見招從此侯芭容問字敢嫌殘墨汚生綃 命題小照

巧宦無心賦遂初身經閩嶠歷崎嶇裝書壓擔隨行屐

得句看山坐小輿荔子香濃甘似酒薯魁味美賤同蔬

南遊寓目都堪紀大手當年較石渠 先生入閩詩甚富又續閩小紀

子規啼徹燕雛飛約束輕裝換葛衣綠柳搖風春已老

黃梅釀雨暑初肥多情最愛湖中水引興時開竹下扉

除却高吟無一事晝長休問客來稀

閩歸重
寓湖上

客報先生江上歸肩輿侵曉出城來青萍牽岸沿湖漲

白板橫門手自開不分寒暄浮一語忙呼詩卷讀千回

高情抗首真天際願得吟鞭日日陪

角韻分鬪愧未堪幸邀獎借敢辭擔從來一顧能空北

自此岐途賴指南品隲世皆推許劭扶疎人欲勝劉惔

他時雅並西園集感激風生酒半酣

先生卜於涼
秋結詩會



